

Peqqussutissatut siunnersuummut oqaaseqaatit

Oqaaseqaatit nalinginnaasut

1. Aallaqqaasiut:

Pisortanit ikiorsiissutit pillugit inatsisartut peqqussutissaattut nutaatut Naalackersuisut siunnersuutaat malittarisassanik atuuttunik pisortanit ikiorsiissuteqartarneq pillugu inatsisartut peqqussutaannik nr. 10-mik, 1. november 1982-imeersumik erseqqissaaneruvoq pisariillisaanerullunilu, soorlu aamma aalajangersakkanik nutaanik ilanngussisoqartoq. Siunnersuummi Isumaginninnermut Ataatsimiititaliarsuup 1997-imi isumaliutissiissutaanit inassuteqaatit aamma malitseqartinneqarput. Aammattaq siunnersuut suliffeqarnermut suliasaqarfimmi tapiissutit pillugit annertunerusumik nutarterinnermut ilaavoq, tassani pingaaruteqarluni suliffissaaleqisut sanngiinnerusut pillugit pimoorussilluni suliniuteqarneq tamatumalu peqatigisaanik sulinerup ilinniagaqarnerullu tamatigut akilersinnaasuunissaat.

Siunnersuutikkut inuiaqatigiinni kalaallini inuttut ataasiakkaatut ataatsimoorluni inooqataaneq pitsaanerusumik nukittorsarneqarlunilu iluaqutissinneqassaaq inunnullu Kalaallit Nunaanniittunut tamanut aningaasaqarnikkut isumannaallisaaviginninnermik pilersitsissalluni. Siunnersuutip aamma imaraa suliniutitigut amerlanerusut sulilernissaasa suliffeqarfimmilu aalaja-ngersimasumik suliffeqalernissaasa qulakkeerneqarnissaat.

Siunnersuummi pisortanit ikiorsiissutinik pisartagaqartoq piuumassuseqarnerulersinniarneqarpoq nammineq inuunerminut akisussaasuunerminik paasinninnissaanut ungasinnerusorlu isigalugu imminut pilersugarilernissaanut. Taamaattumik pisortanit ikiorsiissutisisartup sulisinnaassutsi atorluartariaqarpaa ineriartortillugulu suliffissamik, piginnaanngorsaaqqinnermik, ilinniagaqarnermik inuttullu ineriartornermik neqeroorutit ataasiakkaanut piviusorsioortut atorlugit. Ikiorsiissutit aaqquissuunneqarnera pisortanit ikiorsiissutisisartup nammineq pisariaqartitsinini killisinnaaanilu naapertorlugit siunniuteqarfigisariaqarpaa akisussaqaataaffigalugulu.

2. Siunnersuut pingaarnersiorlugu:

Siunnersuuteqarnikkut inuit suliffeqarfinnut piviusumik sulisinnaassuseqartut aamma inuit inuttut ajornartorsiuteqarnertik pissutigalugu suliffeqarfimmut ataavartumik atassuteqarnissaminnut ajornartorsiuteqartut immikkoortinneqarput. Inuit taakkuusinnaapput atuarteqqinneqarnissaminnut, piginnaanngorsaaqqinnissaminnut, eqaannerusumik suliffeqarnissaminnut il.il.

kajumilersikkuminaatsut, kiisalu inuit naleqqussarnissamut ajornartorsiuteqarneq, peqqiilliorneq assigisaaluunniit pissutigalugit sulisinnaanngitsutut nalilerneqartut. Taamaasiornikkut inuiaqatigiinni inuit sanngiitsut amerlanertigullu qaangiinnarneqartartut erseqqinnerulersinneqassapput, taamaalillunilu inuit taakku sulisinniarnissaat ineriartortinnissaallu annerusumik isiginiarneqarsinnaalerlutik.

Taakku saniatigut suliffissaaleqigallartut aamma sulisinnaanngikkallartut, pilersuinissamut akiligassanullu aalajangersimasunut siunnersuut malillugu pisortanit ikiorserneqarsinnaassapput, suliffeqanngikkallarnermi tapisiaqarnissamut piumasqaatinik naammassinninngikkaluarlutik. Assersuutigalugu inuit taakkuusinnaapput naammattumik nalunaaquttap akunnerinik sulisimanissamut piumasqaatinik naammassinninngitsut.

Soorlu Isumaginninnermut Ataatsimiititaliarsuup inassutigigaa maannakkut pisortat ikiorsiisarnerat pingasoqiusanngorlugu avinneqarsimasoq peerneqarpoq, taamaalilluni siunnersuummi pilersuinissamut akiligassanullu aalajangersimasunut pisortat ikiorsiisarnerat ataasiinnaalerluni. Inatsisartut peqqussutaat atuuttoq pisariaqavissuinnarnut ikiorsiisarnermut pisariaqartitsisunut ikiorsiissutinut annertusisanut aamma ikiorsiissutinut immikkut ittunut immikkoortiterneqarsimavoq, kissaatigineqarsimammat pisuni ataasiakkaani qinnuteqartumut tun-ngasumik naliliisoqarnera aallaavigalugu pisortanit ikiorsiisoqartarnissaa. Immikkoortiterineq paatsiveerunnarsimavoq siunertaalu malillugu kommunalbestyrelsinit atorneqarsimanani. Maleruagassat paatsiveerutsitsisimapput kissaatigineqartorlu naapertorlugu sunnuteqarsimanatik. Ataasiakkaat pisariaqartitsinerat inuunermilu inissisimanerat naapertorlugu ataasiakkaanut pisortat ikiorsiissutaasa aaqqissuunneqarnissaannut periarfissaq ingerlateqqinneqassasoq siunnersuutigineqarpoq, taamaalilluni qinnuteqartut ataasiakkaat pilersuisutut pisussaaffii najukkamilu pissutsinut tunngasut nalilersorneqarneri aallaavigalugit pisortanit ikiorsiissutit missiliuussinikkut annertussusilerneqartassallutik.

Siunnersuummi inunnut tamanut Kalaallit Nunaanniittunut minnerpaamik isumannaallisaanissaq ingerlateqqinneqarpoq. Siunnersuummi qularnaarneqassaaq Kalaallit Nunaanniittunik inoqassanngitsoq inuuniarnissaminut pissaqanngivissunik. Taamatut isumannaallisaanissaq tamanut atuuppoq, apeqqutaatinnagu inuiaqatigiissutsikkut suminngaaneersuuneq aammalu suna pissutigalugu nunatsiniinneq.

Siunnersuummi inuiaqatigiinni inuit sanngiitsut sulilersinnissaat inuttullu ineriartortinnissaat isiginiarneqarput. Nutaatut siunnersuummi piumasarineqarpoq inummut ataatsimut iliuseqarnissamut pilersaarusiortoqartalissasoq, taamaalilluni anguniakkat piviusorsiortut angusinnaaqqullugit qinnuteqartup pimoorussilluni ineriartornissaa sulinissaalu aalajangiusermaneqarput. Iliuseqarnissamut pilersaarummut ilaapput anguniakkat aalajangersimasut angunissaannut ilitsersuineq, tamarmik qinnuteqartup suliffeqarfimmi periarfissaanik pitsaanerulersitsissussat.

Qinnuteqartut ataasiakkaat pisinnaatitaaffii periarfissaallu siunnersuummi isiginiarneqarput. Taamaalilluni kommunalbestyrelsip pisussaaffigivaa aammalu

pisortanit ikiorseqqulluni qinnuteqartup pisinnaatitaaffigalugu iliuseqarnissamut pimoorussisumik pilersaarusiortoqarnissaa, qinnuteqartup piumasarisussaammagu piviusorsiortumik pilersaarusiortoqarnissaa. Aammattaaq malitseqartitsinissamut piunasaqarnerup qulakkiissavaa kommunalbestyrelsip qinnuteqartullu suliap ingerlanerani aalajangiussisimanissaat.

Pisortat ikiorsiissutaasa aallaviusussamik annerpaaffilerneqarnissaat siunnersuutigineqarpoq. Paasineqarsimavoq maleruagassat atuuttut malillugit pisuni arlalinni pisortanit ikiorsiissutisinarneq sulinermit inunnut imminut akilersinnaanerusimasoq. Ilaatigut pissutaalluni inuit pisortanit ikiorserneqartut aningaasartuutitik aalajangersimasut tamaasa pisortanit akilertittarmatigit. Aningaasat annertunerpaaffilerneqarnisigut pinngitsoorneqassaaq inunnut annertuunik aalajangersimasunik aningaasartuutilinnut pisortanit ikiorsiissutisinarnerup akilersinnaanissaa.

Maannakkut maleruagassat atuuttut aamma pisortanit ikiorsiissutisartut piffissami sivikitsuinnarmi sulinissaannut imaluunniit namminerisaminnik annikitsumik isertitaqarnissaannut akornusiippat, tassami pineqartup pisortanit ikiorsiissutisiaaniit akissarsiatut isertitarineqartut toqqaannaartumik ilanngaatigineqartarmata. Tamanna siunnersuummi eqqarsaatigineqarpoq, tassami qinnuteqartoq ulluni ataasiakkaani isertitaqarluni akissarsiaqarsimasoq, ikiorsiissutitigut ullut akissarsiaqarluni isertitaqarfusut amerlaqataannik, imaluunniit aningaasat tunniunneqarsimasut amerlaqataannik ikilileriffigineqartassamat, aalajangiisuussalluni pisortanit ikiorsiissutisartumut suna pitsaanerpaajunersoq.

Maleruagassat atuuttut malillugit suliffeqalernissamut piareersimasuunngikkaanni pilersuinnermut akiligassanullu aalajangersimasunut pisortanit ikiorsiissutisisoqarsinnaanngilaq. Qinnuteqartut ilinniagaqalernissamut imaluunniit suliffeqalernissamut pilerilersikkumallugit siunnersuutigineqarpoq sivikinnerusumik pikkorissarnerup, katsorsartinnerup imaluunniit fag-ini ataasiakkaani atuarnarup nalaani pisortanit ikiorsiissutit atorunnaassanngitsut. Tamatumani assersuutigalugu sullitap atupilunermik ajornartorsiuteqarnermini katsorsartinnermik ikiorserneqarnissaa ajornarunnaassaaq.

Aammattaaq ilaqqat qanigisat toquneranni ilisaanerannilu angalanermut aningaasartuutit ataasiartumik kommunalbestyrelsip ikiorsiisinaanera siunnersuutigineqarpoq.

Siunnersuummi matumani Isumaginninnermut Ataatsimiititaliaruup inassutaasa malinneqarnissaat siunertaralugu naliliiffigineqassaaq, ikiorsiissutit qaqugukkut utertinneqassanersut, aamma ikiorsiissutit qaqugukkut utertinneqarnissaannik pisussaaffiliisoqarsinnaaneranik erseqqisaanissannut siunnersuut pillugu.

3. Pisortanut aningaasatigut allaffissornikkullu kingunissai:

Aningaasaqarnikkut sunniutissat

Siunnersuutikkut pisortanit ikiorsiissutisisartut assersuutigalugu pisinnaangorsarluni pikkorissarnikkut suliffeqalernissamut kajumissuseqalernissaannik periarfissinneqassapput, taamatullu iliuusissanik pilersaarusiaq qinnuteqartut ataasiakkaat siunissami suliffeqalernissamik periarfissaqalernissaat anguniarlugu siunnerfilimmik suliniuteqarnermi sakkussaassalluni.

Siunnersuutikkut pisortanit ikiorsiissutisisartut eqaannerusumik atugassinneqarput, siunertarineqarluni suliffeqarnermiiginnartitsinissaq imaluunniit suliffeqarnermiilersitsinissaq. Taamaattumik ungasinnerusoq eqqarsaatigalugu aningaasatigut sunniutissat kommunitut pitsaasuussasut naatsorsuutigineqarpoq, naatsorsuutigineqarmat sivisunerusumik piumasaqaatitaqanngitsumik pilersuinnermut ikiorsiissutisisartut ikileriassasut.

Peqqussummi atuuttumi pisortanit ikiorsiissutit katillugit annertussusissaat annerpaaffilerneqarsimanngillat. Tamanna sullissinnermi sulilernissamut kajumilersitsinissamik ajornartorsiortitsisimavoq, tamatumani tunngaviatigut pisortanit ikiorsiissutisisartup nalinginnaasumik suliffeqarnermit annertunerusumik katillugu ikiorserneqarsinnaanera periarfissaammat.

Siunnersuummi annertunerpaaffiliisoqarpoq, pisortanit ikiorsiissut annertunerpaamik SIK-ip Naalakkersuisullu isumaqatigiissutaat naapertorlugu suliamik ilinniagaqarsimanngitsutut aningaasarsiat minnerpaat 65%-iattut annertutigisussanngorlugu. Tunngaviusoq, tassaasoq pisortanit ikiorsiissutit annertussusilerneqarneranni ataasiakkaani tamani naliliinikkut, qinnuteqartup pilersuinnissamut pisussaaffii, aalajangersimasumik aningaasartuutai, maannamut inuuniarnermini atugarisimasai aammalu najukkami pissutsit tunngavigalugit aalajangersaasoqartassasoq peqqussutissatut nutaatut siunnersuummi allanngortinneqanngilaq. Annertunerpaaffiliisoqarnera kommunitut pitsaasumik aningaasatigut kinguneqassaaq, qaqutiguinnaq sulisartup ilinniagaqarsimanngitsup aningaasarsiaasa minnerpaat 65%-iat qaangerlugu katillugit ikiorsiisoqarsinnaassammat.

Annertunerpaaffiliinnermi 65 % qinerneqarpoq, tamatumani ikiorserneqartartunik suliffeqalernissamut kajumilersitsisoqassammat, peqatigisaanilli ikiorserneqartartup naammaginarsinnaasumik inuuniarsinnaanera qularnaarneqassalluni.

Allaffissornikkut sunniutissat

Ataatsimut isigalugu pisortanit ikiorsiissutit pillugit peqqussutissatut nutaatut siunnersuutit allaffissornikkut aqunneqarnissaa peqqussutitut atuuttutut iinnarnissaa naatsorsuutigineqarpoq.

Allaffissornikkut aqutsinerup paasilertoruminarnerulernissaa naatsorsuutigineqarpoq, peqqussutissami nutaami pilersuinnermut pisortanit ikiorsiisarneq ataasiinnanngortinneqarmat. Tamanna peqqussummit atuuttumit assigiinngissutaavoq, tassani pilersuinnermut kiisalu aningaasartuutitut

ataasiaannartumik pisortanit ikiorsiisarneq assigiinngitsunut marlunnet aqqitaammat.

Pilersuinermut akiligassanullu aalajangersimasunut pisortanit ikiorsiissutinik qinnuteqarnermut atatillugu qinnuteqartoq innersuussivigineqartassaaq. Innersuussisarnissami siunertaavoq qinnuteqartup pisortanit ikiorsiissutisisartussatut imaluunniit suliffeqanngikkallarnermi tapiissutisisartussatut allatulluunniit attuumassutilimmik ikiorserneqartussatut inissinneqarnissaa. Kommunalbestyrelsit aamma maannakkut malittarisassat atuuttut naapertorlugit naliliinissamut pisussaataapput, qinnuteqartoq pisortanit ikiorserneqassanersoq imaluunniit maleruagassat allat malillugit ikiorserneqassanersoq naliliiffigisartussaagamikku.

Peqqussut atuuttoq naapertorlugu qinnuteqartunik siunnersuinissamik aammalu sulilersitsinissaq siunertaralugu ikiuutissallutik kommunalbestyrelsit pisussaataapput. Pisussaataaffik taanna peqqussutissatut nutaatut siunnersuummi paasiuminarsarlugu erseqqissarneqarpoq. Taamaalilluni erseqqissarneqarpoq pisortanit ikiorsiissutinik qinnuteqartut tamarmik iliuusissanik pilersarusiuunneqartassasut. Aammattaaq pisariaqartitsineq naapertorlugu ingerlaannartumik iliuusissanik pilersarusiaq malitseqartinneqartussaavoq. Malittarisassani atuuttuni kommunalbestyrelsit pisussaaffeqarput qaammatit pingasut qaangiunneranni pisortanit ikiorsiineq malitseqartittassallugu. Qanoq malitseqartitsinissaq pillugu annertunerusumik kommunalbestyrelsinut piumasqaateqartoqanngilaq.

Malitseqartitsinissaq pillugu maleruagassat maannakkut atuuttut paasiuminarsarneqarnerat erseqqissarneqarnerallu pineqarmat allaffissornikkut tamanna sunniuteqassanngilaq.

Taamaalilluni siunnersuutip allaffissornikkut aqunneqarnissaata peqqussummit atuuttumit annertunerunissaa naatsorsuutigineqanngilaq. Taamaattumik kommuninut allaffissornikkut aningaasartuutaanerulernissaa naatsorsuutigineqanngilaq.

Siunnersuutip inatsisartut peqqussutaannit maannakkut atuuttumit ajornannginnerusumik aqunneqarnissaa naatsorsuutigineqarpoq.

4. Aningaasaqarnikkut allaffissornikkullu inuussutissarsiuteqartunut il.il. sunniutissai:

Siunnersuut inuussutissarsiuteqartunut aningaasaqarnikkut allaffissornikkullu sunniuteqassanngilaq.

5. Avatangiisinut pinngortitamullu sunniutissai:

Siunnersuut avatangiisinut pinngortitamullu sunniuteqassanngilaq.

6. Allaffissornikkut innuttaasunut sunniutissai:

Siunnersuutip allaffissornikkut innuttaasunut sunniuteqarnissaa naatsorsuutigineqanngilaq. Siunnersuutip innuttaasunut paasiuminarnerulernissaa naatsorsuutigineqarpoq.

7. Naalagaaffeqatigiinnermut aamma namminiilernissamut tunngasut:
Siunnersuut Naalagaaffeqatigiinnermut namminiilernissamullu tunngasunut sunniuteqassanngilaq.

8. Pisortat kattuffiillu tusarniaaviginerat:

Pisortanit ikiorsiissuteqartarneq pillugu inatsisartut peqqussutissaattut siunnersuut oqartussaasuni kattuffinnilu makkunani tusarniaassutaasimavoq:

KANUKOKA, SIK, Kalaallit Nunaanni Sulisitsisut Peqatigiiffiat, AK, IMAK, ILIK, PIP, KNAPK, Akileraartarnermut Pisorta qarfik, Aqutsinermut Pisorta qarfik, Peqqissutsimut Pisorta qarfik, KIIP, Inuussutissarsiornermut, Nunalerinermut Suliffeqarnermullu Pisorta qarfik, Aalisarnermut Piniarnermullu Pisorta qarfik kiisalu Aningaasaqarnermut Pisorta qarfik.

Oqartussaasut kattuffiillu makku tusarniaanermi akissuteqarsimapput:
KANUKOKA, SIK, Sulisitsisut Peqatigiiffiat, AK, IMAK, ILIK, PIP, Akileraartarnermut Pisorta qarfik, Peqqissutsimut Pisorta qarfik, KIIP, Inuussutissarsiornermut, Nunalerinermut Suliffeqarnermullu Pisorta qarfik, Aalisarnermut Piniarnermullu Pisorta qarfik kiisalu Aningaasaqarnermut Pisorta qarfik.

Tusarniaanermi akissutitut oqaaseqaatit uingasunngortillugit Pisorta qarfimmit allanneqarsimapput.

Tusarniaanermiit siullermiit akissutit:

KANUKOKA isumaqarpoq peqqussutissatut siunnersuut kommuuninut aningaasatigut allaffissornikkullu kinguneqarumaartoq.

Kingunerisaanik Ilaqtariinnermut Pisorta qarfiup oqaaseqaatini aningaasatigut allaffissornikkullu kingunissanik allannngortitsivoq.

KANUKOKA-mit uparuarneqarpoq tusarniaanermut killigititaasup sivilissusaa naammaginangitsoq kiisalu piffissap tusarniaaffiusup naleroraa kommuunini aasaanerani sulinngiffeqarneq.

Ilaqtariinnermut Pisorta qarfimmit ajuusaarutigineqarpoq tusarniaanermut killigititaasup sivilinnera.

KANUKOKA-mit oqaatigineqarpoq pisortanit ikiorsiisarnerup siumoortumiit kingumoortumut allannngortinneqarnerani ikaarsaariarnermi ajornartorsiuteqartussaasoq.

Kingunerisaanik Ilaqutariinnermut Pisortaqarfimmit ikiorsiissutinik tunniussisarnissaq allangortinneqarpoq siumoortumik pisartussatut.

KANUKOKA-mit erseqqissaqquneqarpoq pequtissatut siunnersuummi qanoq ilinikkut ilisisoqarneranut aningaasartuutit pisortanit ikiorsiissutitut tunniunneqartassanersut.

Ilaqutariinnermut Pisortaqarfimmit oqaaseqaatini tamatumunnga tunngasooq itisilerneqarpoq.

Pisortanit ikiorsiissuteqartarnermi ataasiakkaanut iliuusissanik pilersaarusiortalernissaq KANUKOKA-mit ilassilluarneqarpoq. Kommuuninili ilinniarsimasunik sulisussaaleqiffiusuni imaluunniit nalinginnaasumik sulisussaaleqiffiusuni KANUKOKA-mit isigalugu piviusorsiortuusussaannigilaq iliuusissatut pilersaarutitik malitseqartitsisarnissap qaammatit pingasut qaangiutsinnagit naammassineqartartussatut siunnersuutigineqarnera.

Ilaqutariinnermut Pisortaqarfimmit malitseqartitsinissamut qaammatinik pingasunik killeqartitsinissamik piunasaqaat peerneqarpoq, imaalillugu kommunalbestyrelsip iliuusissatut pilersaarut naliliiffigeqqittassagaa iluarsiiiffigalugulu pisariaqartitsineq naapertorlugu.

Aammattaaq KANUKOKA-mit nassiunneqarput kommuunit ataasiakkaat peqqussutissatut siunnersuummut oqaaseqaataat.

Kommuunit ataasiakkaat akornanni arlalinnit ernummatigineqarpoq § 23 naapertorlugu Kalaallit Nunaanni angerlarnissamut pisortanit ikiorneqarsinnaanermut siuliani siunnersuutaasimasooq. Kommuunit isumaqarput inuup nammineq ajornartorsiutigigaa uternissaminut akissaqarani nunaminnit aallarnissani.

Tamatumuma kinguneranik aalajangersagaq peqqussutissatut siunnersuummit peerneqarpoq.

Kommuuninit arlalinnit aammattaaq oqaatigineqarpoq pisortanit ikiorsiissutinik sivisunerpaamik ullut 14-ikkuutaarlugit pisalernissap ajornartorsiutinik pilersitsisinnaanera. Ajornartorsiutit pinngorsinnaapput akiligassanut aalajangersimasunut tunngatillugu tunniussisarnissaq, amerlanertigut taakku naatsorsorneqartarmata qaammammoortumik ullut 14-ikkuutaartuunngitsumik. Taamaammat oqaatigineqarpoq kissaatigineqartoq pisortanit ikiorsiissutit

siunnersuutigineqartutut ullut 14-ikkuutaarnagit qaammammoortumilli tunniunneqartarnissaat.

Tamatuma kinguneranik Ilaqutariinnermut Pisortaqarfiup siunnersuut allangortippaa, periarfissaqalersillugu pilersuinnermut akiligassanullu aalajangersimasunut pisortanit ikiorsiissutinik tunniussinermi piffissaq ullunit 14-init sivilunerutinneqassasoq.

Piniartunut aalisartunullu pisortanit ikiorsiissutinik tunniussinnermut atatillugu kommuunit isumaqarput ajornartorsiutinik pinngortoqarsinnaasoq, peqqussummi taaneqarmat "isumaginnikkut pisoqarnera" pisortanit ikiorsiissuteqarnissamut tunngaviussasoq.

Ilaqutariinnermut Pisortaqarfimmit malugeqquarput piniartut aalisartulli inuussutissarsiutilittut allatuulli pisortanit ikiorsiissutisisinnaatitaammata taakkulu pisortanit ikiorsiissutinik pinissamut piumasaqaatit allatuulli naammassisussaammatigik.

Pisortanit ikiorsiissutinik akileraarusersuilersinnaanermut tunngatillugu uparuarneqarpoq pisortanit ikiorsiissutinut akileraarutaasussanut ilaammata meeqqanut tapit ineqarnermullu tapit. Tamanna malittarisassani atuuttuni ilanngunneqarsimanngilaq. Pisortanit ikiorsiissutit akileraarusersorneqalerpata tamatuma kingunerisussaavaa pisortanit ikiorsiissutisisartut akissarsiortunut allanut taamatut aningaasarsialinnut naleqqiullutik meeqqanut tapit ineqarnermullu tapit eqqarsaatigalugit pitsaanagerusunik atugassaqartitaajunnaarnissaat.

Pisortanit ikiorsiissutit malittarisassat atuuttut malillugit isertitanut akileraarutaasussanut ilaareerput. Siunertaasoq tassarpiaavoq pisortanit ikiorsiissutisisartut taamatut isertitaqarlutik akissarsiortunit pitsaanagerusumik atugassaqartitaannginnissaat.

Kommuuninit taakkartorneqarpoq pisortanit ikiorsiissutit ikinnerulersinneqarsimasut tunniunneqartalerpata meeqqanik inuusuttuaqqanillu ikiorsiisarnermi aningaasartuutissat qaffannissaat naatsorsuutigisariaqartoq taamaaliornikkut pinngitsoortinniarneqassammat ilaqutariit meerartallit inuuniarnerminni atugarisaasa ajorseriarnerisigut meeqqanut iluaqutissat ajorseriannginnissaat.

Ilaqutariinnermut Pisortaqarfimmit siunnersuut allangortinneqarpoq, imaalillugu pisortanit ikiorsiissutit naatsorsorneqarneranni meeqqanut iluaqutissat tamatigit pingaarnernerutinneqartassasut.

Kommuuninit ujartorneqarpoq ataasiakkaanut iliuusissatut pilersaarusiornermi immersugassamik qarasaasiakkuq immersorneqarsinnaasumik peqalernissaa. Immersugassap qitiusumit suliarineqarnissaa kissaatigineqarpoq taamaaliornikkut kommuunit ataasiakkaanut iliuusissatut pilersaarusiornerminni immikkut sulisinneqartarnissaat pinngitsoortinniarlugu.

Ilaqutariinnermut Pisortaqarfiup Inuussutissarsiornermut Pisortaqarfik suleqatigalugu iliuusissatut pilersaarusiornissamut qarasaasiakkuq immersugassaq suliaraa.

Kommuunip ataatsip ujartorpaa "suliffeqanngikkallarnermi tapiissutit" qanoq paasisariaqarnersut, taanna peqqussutissamut siunnersuummi § 4-mi § 10-milu atorineqarmat.

Suliffeqanngikkallarnermi tapiissutit tassaapput annertussusileriikkamik ikiorsiissutit maanna atuuttut taartaat, taannalu qanittukkuq inatsartut suliffeqanngikkallarnermi tapiissutit peqqussutissaattut akuersissutigeqqammerpaat.

Aarleqqutigineqarpoq siunertaanersoq aningaasartuutissanik peersinissaq, assersuutigalugu inigisamut akiliutit paaqqinnittarfimmullu akiliutinik pisortanit ikiorsiissutinut matuneqartarunnaassanersut, akiligassat taakku akuttunngitsumik akiligassaasuusaartinneqartarmata, pisortanit ikiorsiissutisisartup akissaqartitaasut. Akiligassat sivisuumik akiligassaasarput, taamalu innuttasup isertitaarunneratigut akilerneqarsinnaajunnaartarlutik.

Oqaaseqaatit ilaatigut siunnersuummut ilanngunneqarput.

Kissaatigineqartutut oqaatigineqarpoq aqutsisoqarfiup pisortanit ikiorsiissutit tamatigut aningaaserivimmi konto-mut ikisassagai.

Oqaaseqaatit ilaatigut ilanngunneqarput, aalajangersakkami ilanngunneqarsimammat aningaaserivimmi kontomut assigisaanulluunniit ikisisoqartassasoq. Kommuunilli periarfissinneqanngillat piumasaqaateqassallutik pisortanit ikiorsiissutit aningaaserivimmi kontomut tunniunneqartarnissaannik.

Peqqussutissatut siunnersuummi akiligassanut aalajangersimasunut pisortanit ikiorsiissutissat aningaasannorlugit tunniunneqartarnissaannik malittarisassaliornissaq kommuuninit iluarineqarpallaanngilaq. Kommuuninit aarleqqutigineqarpoq tamatumaa kinguneranik pisortanit ikiorsiissutinut aningaasartuutit qaffariarnissaat.

Ilaqutariinnermut Pisortaqarfiup malittarisassaq pingaarnersooq aalajangiusimaannarpaa, tassalu pilersuinnermut akiligassanullu aalajangersimasunut pisortanit ikiorsiissutit inuttaannut tunniunneqartassasut, pisortaqarfik isumaqarmat ikiorsiissutisisartut ataasiakkaat namminneq inuunerminnut aningaasaqarnerminnullu akisussaasuusussaaneq ilinniartariaqaraat.

Apeqquserneqarpoq naammannersooq inuit ataasiakkaat § 19 aamma § 20 naapertorlugit tun-ngavissanik naammassinninnerat atussallugu imaluunniit ilaqutariit tamarmiusut uuttuutitut atorneqassanersut. Ujartorneqarpoq peqqussutissatut siunnersuummi malittarisassat erseqqissarneqarnissaat.

Pissutsit oqaaseqaatini itisilerneqarsimapput.

Aningaasaqarnermut Pisortaqarfik kiisalu Inuussutissarsiornermut, Nunalerinnermut Suliffeqarnermullu Pisortaqarfik(tamatuma kingorna pisortaqarfiit) ataatsimoorlutik tusarniaanermi akissutinik tunniussaqrput.

Pisortaqarfinit ilanngussassatut kissaatigineqarpoq ilinniagaqarsimaneq akilersinnaajuaannarnerata erseqqissaatigineqarnissaa.

Peqqussutissatut siunnersuummi oqaaseqaatit ilanngunneqarput.

Pisortaqarfinit ujartorneqarpoq Ilaqutariinnermut Pisortaqarfiup pisortanit ikiorsiissuteqartarneq pillugu peqqutissatut siunnersuutip kiisalu suliffeqanngikkallarnermi tapiissuteqartarnerup peqqussutip ataqatigiissarneqarnissaanut suleqataanissaa.

Ilaqutariinnermut Pisortaqarfiup Inuussutissarsiornermut Pisortaqarfik suleqatigaa pisortanit ikiorsiissuteqartarneq pillugu peqqussutissatut siunnersuutip kiisalu suliffeqanngikkallarnermi tapiissuteqartarnermut peqqussutissatut siunnersuutip ataqatigiissarneqarnerani. (Suliffeqanngikkallarnermi tapiissuteqartarnermut inatsisartut peqqussutaat Inatsisartut ukiakkut ataatsiminneranni 2006-imi aalajangiunneqarpoq.)

Taamatuttaaq pisortaqarfinit kissaatigineqarpoq peqqutissatut siunnersuummi aalajangersakkat nutaat allaffissornikkut aningaasatigullu kingunissaat naliliiffigineqassasut.

Ilaqutariinnermut Pisortaqarfiup KANUKOKA suleqatigalugu aningaasatigut allaffissornikkullu kingunissat naatsorsuusiorsimavai.

Pisortaqarfinnit isornartorsiorneqarpoq pisortanit ikiorsiissutinik pisartagallit saniatigut isertitaqarsinnaatitaanerat (siunnersuummi §13) pisortanit ikiorsiissutisineramik saniatigut. Pisortaqarfiit isumaqarput pisortanit ikiorsiissutit inunnt suliffissaqartitsineranut attuumassuteqan-ngitsunut tunngasuusariaqartut.

Inuit suliffeqarnermut attuumassuteqalaarsinnaasut pisortanit ikiorsiissutinut malittarisassani aamma ilaasussaapput, suliffeqanngikkallarnermi tapiissuteqartarnermut inatsisartut peqqussutaanni malittarisassat allassimaneranniit sivilunerusumik inuit piffissami sivilunerusumi suliffissaaleqisut pisortanit ikiorsiissutinik pisartagaqartussaammata. Aamma siunertamut tulluurtuuvog pisortanit ikiorsiissutisartut suliffissarsiorsinnaanerat tunngavissinneqarpat.

Pisortaqarfinnit aarleqqutigineqarpoq pisortanit ikiorsiissutit aningaasanngorlugit tiguneqartalernerisa kingunerannik tiguisup aningaasaatiminik aqutsiuminaatsilersinnaanera tamatumalu kinguneranik akiligassaminik akiliinngitsoorluni.

Siunnersuummi allassimavoq pissutsit immikkut ittut atuutsillugit pilersuineranut akiligassanullu aalajangersimasunut pisortanit ikiorsiissutit aningaasanngornagit tunniunneqarsinnaasut imaluunniit akiligassamik nassitsisumut toqqaannartumik akilernerqarlutik, takuuk § 16-imi, imm. 2. Pisortanit ikiorsiissutit tunniunneqartalernissaat pillugu Ilaqutariinnermut Pisortaqarfiup siunnersuutaanut tunngaviuvoq kisaatigineqarmat pisortanit ikiorsiissutisartup inuunerminut aningaasaqarnerminullu akisussaassuseqarnerminik ilinniarnissaa.

Pisortaqarfiit isumaqarput pissusissamisuuginnassasoq inuttaasut pisortanit ikiorsiissutinik qinnuteqartut qitiusumik ilitersuisarfinnut ilisaritiffinnullu nutaanut saaffiginnittarnissaat. Taamatut najoqqutassaqaarnermi pisortanit ikiorsiissutisinnissamik suliffeqarnermiluunniit akiliutinik qinnuteqartoq saaffiginneqqaarneranit sumiiffissineqarsinnaalissaaq. Pisortaqarfiit isumaqarput aaqqissuussineq taanna peqqussummi allassimasariaqartoq.

Siunnersuut ilanngunneqanngilaq pisortanit ikiorsiissutinik piniarlutik qinnuteqartut periarfissaqartariaqarmata toqqaannartumik inunnik isumaginninnermut allaffinnut saaffiginninnissaminut.

Pisortaqarfiit isumaqarput iliusissatut pilersaarutip imarisaa piginnaangorsaaqqinnissamut peqqussummi iluarsivigineqareersoq. Taamaattumik iliuusissatut pilersaarutip imarisaa pisortanit ikiorsiissuteqartarneq pillugu peqqussummi aamma iluarsivigariaqanngitsoq.

Inuit sivikinnerusumik sivilunerusumilluunniit suliffissaaleqisut piginnaangorsaaqqitassaannigitsullu kajumilersinniartariaqarput taamaattumillu iliuusissatut pilersaarummik pisariaqartitsillutik. Iliuusissatut pilersaarutip siunnersuummi eqqartorneqartup assiginngilaa piginnaangorsaaqqittarneq pillugu iliuusissatut siunnersuut.

Pisortaqarfinit maqaasineqarpoq iliusissatut pilersaarutip suliarineqareersimasup aqutsisoqarfimmut allamut ingerlateqqinneqartarnissaa pillugu aalajangersagaqarnissaa, taamaalilluni iliuusissatut pilersaarussiaq pisortanit ikiorsiissutinik pisartagalimmut malinnaatinneqarsinnaaniassammat, assersuutigalugu pineqartoq suliffeqarnermi ikiorsiissutinik piginnaangorsaaqqinnermiluunniit ikiorsiissutinik pisartagaqalernissamut nuutinneqarpat.

Siunnersuut peqqussutissatut siunnersuummut ilanngunneqarpoq.

Sulisitsisut Peqatigiiffiata kissaatigaa § 6-imi imm.1, nr. 1 allatut oqaasertalerneqassasoq, Sulisitsisut Peqatigiiffiat isumaqarmat pisortanit ikiorsiissutit tassaassasut utaqqiisaagallartumik ikiorsiissutit.

Siunnersuut peqqussutissatut siunnersuummut ilanngunneqarpoq.

Sulisitsisut Peqatigiiffiat isumaqarpoq § 7-imi aalajangersakkami takuneqarsinnaasariaqartoq sulisinnaajunnaarallarneq pineqartoq, taamaanngippat pisartagalik siusinaartumik pensionisianik pisartagaqartariaqarmat piginnaangorsaaqqinneqarluniluunniit.

Siunnersuut ilanngunneqanngilaq peqqussutissatut siunnersuutip siunertarerpiarmagu sivilisuumik suliffissaqanngitsut naleqqussagaannginnertik pissutigalugu peqqiillionertilluunniit pissutigalugu suliffeqanngikkallartut sulinissamut kajumilersinneqarnissaat. Isumaavoq gruppi taassuma sulisinnaalerseqqinneqarnissaa piginnaangorsaaqqinneqaannarani.

Pisortanit ikiorsiissutinik imaluunniit suliffeqarnermi akiliutinik pisartagaqarnissamut tun-ngavissat erseqqinnerusariaqarput. Sulisitsisut

Peqatigiiffiata naatsorsuutigaa qaqugukkut pisortanit ikiorsiissutinik qaqugukkullu suliffeqanngikkallernemi tapiissutinik tunniussisoqartarnissaa pillugu erseqqinnerusunik malittarisassaqaqtariaqartoq.

Siunnersuut ilanngunneqanngilaq naliliineq naapertorlugu ajornartorsiutitut isigineqartariaqanngimmat qaqugukkut inuk suliffeqanngikkallarnemi tapiissutinik imaluunniit pisortanit ikiorsiissutinik pisartagaqassanersoq. Pisortanit ikiorsiissutit suliffeqarnermi akiliutinit tamatigut kingulliusartussaapput.

SIK-mit ujartorneqarpoq innuttaasut saaffigineqqaarnermik kingorna iliuusissatut pilersaarut siunnersorneqarnerlu eqqarsaatigalugitt qanoq sukkatigisumik ikiorneqartarnissaannut killiliinissaq.

Siunnersuut ilanngunneqanngilaq nalilernerqarmat killiliinerit siunertamut tulluartaunaviangitsut, kommuunit killiliussanik eqqortitsinissaminnut periarfissaqanngippata. Sullissinermi ileqquusut nalinginnaasut malillugit pisortanit ikiorsiissutinik pisartagaqalernissaminik qinnuteqartoq sukkanerpaamik siunnersorneqarlunilu iliuusissatut pilersaarusiortfigineqartartussaavoq.

Tusarniaanerup aappaani akissuteqaatit:

KANUKOKA nalunaarpoq takusinnaanagu kommuunit oqaaseqaataasa tusarniaanermi siullermeersut ilanngunneqarsimanerat.

Siuliani taaneqartut innersuussutigineqassapput.

Aningaasat tunniunneqartussat annerpaaffissaat 85 %-imiit 65 %-imut allangortinneqarput. KANUKOKA-mit ujartorneqarpoq 65 %-imut appartitsinermut tunngavilersuut.

Aningaasatigut kingunissat pillugit naatsorsuusianik itisiliineq innersuussutigineqarpoq.

Siunnersuutigineqarpoq kommunalbestyrelsi aalajangersinnaasoq pilersuinermit akiligassanullu aalajangersimasunut pisortanit ikiorsiisarneq qaammatikkuutaartumik imaluunniit ullut 14-ikkuutaartumik pisassanersoq.

Siunnersuut ilaatigut siunnersuummut ilanngunneqarpoq, akiligassanut aalajangersimasunut tunngasortaa eqqarsaatigalugu, akiligassaq takkukkaangat akiliinissaq toqqarneqarsinnaalluni. Ilaqutariinnermut Pisortaqaqfiup siunertamut

tulluartsorinngilaa pilersuinnermut pisortanit ikiorsiissutit ullunik 14-inik sivilisunerusukkuutaarlugit tunniunneqartarnissaat.

KANUKOKA-mit naammagineqanngilaq qaammatit pingasut qaangiunneri tamaasa malitseqartitsisarnissaq.

Siunnersuut peqqussutissatut siunnersuummut ilanngunneqarpoq

Ilisinnermut aningaasartuutitut tunngatillugu KANUKOKA-mit erseqqissaqquneqarpoq Ilaqutariinnermut Pisorta qarfiup Peqqissutsimullu Pisorta qarfiup akornanni akisussaaffiliinissaq.

Illerfinnik angallassinermi aningaasartuutit matussusiisarnissamut malittarisassaq siunnersuummit peerneqarpoq.

Aammattaaq KANUKOKA-mit erseqqissaqquneqarpoq siusinaartumik pensionisianik pisartagaqalernermut atatillugu pisortanit ikiorsiissutit ilanngaanneqartarnissaannut tunngasut.

Erseqqissaatit peqqussutissatut siunnersuummut ilanngunneqarput.

KANUKOKA-mit ujartorneqarpoq pisortanit ikiorsiissutitut ilitersuuteqarnissaq.

Peqqussutip atuutilersinneqarneranut atatillugu nalunaarusiortoqassaq, ilitersuisoqarluni kommuuninilu pikkorissartitsisoqassalluni.

KANUKOKA'p naatsersorsimavaa § 10 naapertortugu pilersaarusiortalernissamut atatillugu kommunit 3 mio. koruuninik annertunerusumik aningaasartuutigissagaat.

KANUKOKA'p naatsorsuutigaa inuit 8.500 siunnersuut malillugu pilersaarusiunneqarnissartik pisariaqartissagaat. Pilersaarusiornermut ataatsimut akunnerit marluk atorneqartassappata, ukiumut atorfiit qulit pisariaqartinneqalissapput.

Ilaqutariinnermut Pisorta qarfik KANUKOKA'p aningaasatigut missingersuutaanut isumaqataanngilaq, maannamummi suliamik ingerlatsinermi ileqqorissaarnek malillugu, kommunit ingerlaavartumik naliliiffigisarsammaassuk pisortanit ikiorsiiffigineqartup atugarisa, matumani ilanngullugu pimoorullugu

sulissutigineqartarmat pineqartup suliffeqalernissaa. Maannalu pisortanit ikiorsiisarnermut peqqussuummi atuuttumi anguniagaangilaq piumasagaatitaqanngitsumik ikiuisarnissaq. Iliuuseqarnissamut pilersaarusiap aallaavigissavaa siunnersuisimaneq aammalu pisariaqartitsineq naapertorlugu imarissallugu ilitsersuutit pisariallit. Peqqussut atuuttoq malillugu Kommunalbestyrelsi siunnersuisarnissamut ilitsersuisarnissamullu pisussaaffeqareerpoq, ilanngullugu taaneqassaaq kommunalbestyrelsip pisortanit ikiorsiissutit qaammatit pingasukkaarlugit naliliiffigisassagaa. Kiisalu pisortanit ikiorserneqartartut amerlanersaat iliuuseqarnissamut pilersaarusiorgineqareersimassapput pisortanit ikiorneqarnissaminnik qinnuteqaqqaaramilli. Pisortanit ikiorsiissutinik pisartagallit amerlanersaat siusinnerusukkut suliffeqanngikkallarnermi ikiorsiissutinik pisartagaqarnikuupput, tamatumani iliuuseqarnissamik pilersaarusiorneqarnissaq ataasiakkaanut pisinnaatitaaffioreerluni. Arlaqartut ilinniakkamik naammassinnittuusimassapput, Piareersarfimmeereersimassallutillu qanorlu iliuuseqarnissamut pilersaarusiorgineqareersimassallutik. Aammattaaq piffissami matumani qarasaasiat aqutigalugit atortussamik pilersitsiniartoqarpoq, taamaasippat qanoq iliuuseqarnissamut pilersaarusiortarnissanut. Aningaasartuutit Piareersarfimmut aningaasaliissutinut matussutissaqareersut.

SIK-p IMAK peqatigalugu ujartorpaa pisortanit ikiorsiissutit minnerpaaffigilerneqarnissaat.

Siunnersuut ilanngunneqanngilaq. Siunnersuummi erseqqissarniarneqarpoq pisortanit ikiorsiissutisiallip annertuumik akiligassanik aalajangersimasunik peqannginnissaa, pisortanit akilerneqartussanik. Aamma erseqqissarniarneqarpoq matumani malittarisassaq pingaarneq tassaasoq pisariaqartitsisoqartillugu pisortanit ikiorsiissutisiassat amerlanerusut tunniunneqarsinnaanerat.

SIK-mit ujartorneqarpoq "isumaginnikkut pisoq" qanoq itisilertariaqarnersoq.

Oqariartaaseq oqaaseqaatini itisilerneqarpoq.

SIK-mi kissaatigineqarpoq pisortanit ikiorsiissutinik pisartagallip siunnersorneqarnissaanut piffissamik killiliisoqarnissaa.

Sulianut tunngasut pissutigalugit siunnersuut ilanngunneqanngilaq. Oqaatigisariaqarporli sullissilluarnerup ilagimmagu pisortanit

ikiorserneqarnissamik qinnuteqartup saaffigineqqaarnermini tamatumaluunniit kinguninnguatigut siunnersorneqartussaaitaanera.

Aammattaaq SIK-mit kissaatigineqarpoq iliussissatut pilersarusiornermi piffissamik killiliisoqarnissaa.

Sulianut tunngasut pissutigalugit siunnersuut ilanngunneqanngilaq, kissaatigineqanngimmat piffissamik kommuuninit malinneqarnissaminik periarfissaqarfineqanngitsumik killiliisoqarnissaa.

SIK-p kissaatigaa piumasaqaataassasoq malitseqartitsinissamut atatillugu pisortanit ikiorsiissutissisartup peqataatinneqartarnissaa.

Sulianut tunngasut pissutigalugit siunnersuut ilanngunneqanngilaq, sullissilluarnissaq pillugu ileqquusut nalinginnaasut malillugit pisortanit ikiorsiissutisartoq iliussissatut pilersaarutip suliarineqarnerani peqataatinneqartussaammat.

SIK-mit uparuarneqarpoq pisortanit ikiorsiissutinik aningaasannagornagit tunisinerup inuit inuunerminnut akisussaasutut misigilersinnaviannikkai.

Suleriaatsip atuuttup atuutiinnarnissaa kissaatigineqarpoq, pingaarutilittut isigineqarmat aningaasannagornagit ikiorsiinissamut periarfissaqarnissaa, tamatumuuna qulakkeerniarlugu ikiorsiissutit assigisaalu nerisassarsiniutigineqarnissaat.

Piffissap sivikinnerusumik qanoq paasisariaqarneranik nassuiaat amigaataavoq.

Siunnersuut peqqussutissatut siunnersuummut ilanngunneqarpoq.

SIK-mit uparuarneqarpoq pilersuinissamut akiligassanullu aalajangersimasunut pisortanit ikiorsiissutit tunniunneqartartussaanagerat suliffissaaleqinerup aallartinnerani ullormit siullermiit, naak tamanna ullormut saaffigineqaarfimmut naapertuutinnikkaluartoq.

Ulloq saaffiginniffik aallarnerfigalugu aatsaat pisortanit ikiorsiissutit tunniunneqarsinnaapput, siunertamut tulluartuunngimmat kingumoortumik

atuutilersitsisarnissaq. Pisortanit ikiorsiissutisisartup nammineq soqutigisariaqarpaa piaartumik kommunalbestyrelsimut saaffiginninnissani.

SIK-mit uparuarneqarpoq § 12, imm. 4 naapertorlugu immikkut ittut suunerisa erseqqissarneqarnissaat kiisalu § 26-mi utertitsisussaataitanermut tunngasut erseqqissarneqarnissaat.

Erseqqissaatit peqqussutissatut siunnersuummi ilanngunneqarput.

SIK-taaq uparuarpaa siunertamut tulluurtuunngitsaq inatsisartut peqqussutaata atuutilersinneqarneranut nalunaarutit tulluarsagaanninnerat.

Nalunaarutit ilitsersuutillu suliarineqartussaapput inatsisartut peqqussutaata atuutilernera ilutigalugu atuutilersinneqartussatut.

Sulisitsisut Peqatigiiffiat isumaqarpoq siunnersuummi ilaasariaqartut sulilersinneqartussaataitanermut tunngasut.

Peqqussutissatut siunnersuummi § 7-imi, imm. 1-imi, nr.1-imi tamanna erseqqissarneqarsimavoq.

Sulisitsisut Peqatigiiffiata inassutigaa pisortanit ikiorsiissutit pikkorissarnernut sivikinnerusunut peqataanerni pisartagarineqaannartarnissaat.

§ 14 tamannarpiaq siunertaralugu aalajangersaanissamut periarfissaqartitsivoq.

IMAK-imit ujartorneqarpoq § 17, imm. 2-p erseqqissarneqarnissaa, meeqqap pisariaqartitsinera aalajangiisooqqullugu.

Erseqqissaaneq peqqussutissatut siunnersuummut ilanngunneqarpoq.

Aammattaaq IMAK-imit kissaatigineqarpoq paasinernerulersinneqassasoq Naalackersuisunit siunnersuutigineqartutut meeqqanut ileqqaarutissat § 18-imut qanorpiaq sunniuteqarumaarnersut.

Meeqqanut ileqqaarutissat meeqqat pissaraat, taakkulu pisortanit ikiorsiissutisartup pigisaanut ilanngunneqassanngillat.

Aningaasaqarnermut Pisorta qarfik isumaqarpoq allaffissornikkut aningaasatigullu kingunissat naammattumik paasinarsarneqarsimanngitsut.

Ilaqutariinnermut Pisorta qarfiup KANUKOKA peqatigalugu aningaasatigut allaffissornikkullu kingunissat itisilerlugit naatsorsuusiorsimavai.

Akilerartarnermut Pisorta qarfiup inassutigaa § 27-imi akileeqqusineq peerneqassasoq, pisortanut akiitsunik akileeqqusisarneq pitsaaliuinissarlu pillugit inatsisartut inatsisaannut nr. 3-mut 2. maj 1996-imeersumut naapertuutinngimmat.

Siunnersuut peqqussutissatut siunnersuummut ilanngunneqarpoq.

Inuussutissarsiordermut, Nunalerinnermut Suliffeqarnermullu Pisorta qarfimmit apequtigineqarpoq sulinermi ajutoortoqartillugu tassanngaannartumik pilertortumik pisariaqartitsinermi pisortanit ikiorsiissutinik tunniussisoqarsinnaanersoq.

Tassanngaannartumik pilertortumik pisariaqartitsisoqartillugu pisortanit ikiorsiissutinik tunniussisoqarsinnaavoq. Sulinermi ajutoorneq napparsimanermik kinguneqartussaassamat, sulinermi ajutoorneq § 6-ikkut aamma matussuserneqarsinnaassaaq.

Pisorta qarfiup siunnersuutigaa § 8-mi misissuiffigineqarnissamut tunngasoq erseqqissarneqassasoq, taamaaliornikkut tapiissutit allat § 10 malillugu iliussissatut pilersaarusiornissamut attuumassutillit ilanngunneqarsinnaaqullugit.

Siunnersuutit peqqussutissatut siunnersuummut ilanngunneqarput.

Pisorta qarfimmit apequtigineqarportaaq iliussissatut pilersaarutit § 10 naapertorlugu aqutsisoqarfimmut allamat ingerlateqqinneqartarnissaat pillugu aalajangersagaqartariaqannginnersoq.

Siunnersuut peqqussutissatut siunnersuummut ilanngunneqarpoq.

Aalisarnermut Piniarnermullu Pisortaqarfiup apequtigaa § 13-imi arlaqarnerusunik assersuusiortoqarsinnaannginnersoq.

Siunnersuut peqqussutissatut siunnersuummut ilanngunneqarpoq.

Peqqussutissatut siunnersuummi aalajangersakkanut ataasiakkaanut oqaaseqaatit.

§ 1-imut

Siunnersuutip kikkut tamarmik, apequtaatinnagu inuiaqatigiissutsikkut suminggaaneersuuneq, allatigut nammineerlutik aningaasaqarnikkut aniguisinnaanngitsut aningaasaqarnikkut isumannaallisaavigineqarnissaat qulakkiissavaa. Piumasaqaataanngilaq aalajangersimasumik Kalaallit Nunaanni najugaqartuunissaq. Siunnersuummut ilaapput inuit Kalaallit Nunaanni angalasut.

Pisortanit ikiorsiissutitut taaneqartarput ikiueriaatsit sulluunniit, pisortanit ikiorsiissuteqartarneq pillugu inatsisartut peqqussutaat malillugu ikiorsiissutaasartut. Tamakkuupput soorlu tassanngaannartumik pilertortumik ikiorneqarnissaminnik pisariaqartitsisut, pilersuinnermut akiligassanullu aalajangersimasunut pisortanit ikiorsiissutinik kiisalu immikkut ittumik pisoqartillugu pisortanit ikiorsiissutinik pisariaqartitsisut.

Tassanngaannartumik pilertortumik ikiorserneqartussaavoq inuk Kalaallit Nunaanniittoq pissaaleqilersimasoq, imminut ilaqtaminillu pilersuisinnaajunnaarsimasoq, takuuk § 6. Pilersuinnermut akiligassanullu aalajangersimasunut pisortanit ikiorsiissutit tassaapput akissarsianit isertitat taartaat, takuuk § 7. Aammattaaq immikkut pisoqartillugu ataasiaannartumik pisortanit ikiorsiisoqarsinnaavoq, takuuk kapitel 6.

§ 2-imut

Imm. 1-imut tunngasoq
Aalajangersakkap inatsimmi atuuttumi § 3 assigaa.

Aalajangersakkamiippoq katissimallutik aappariit imminnut pilersoqatigiittussaataitanerat.

Pilersoqatigiittussaataitanermi aallaaviuvoq aappariinnermut inatsisimmi malittarisassani § 2.

Inuit aappariittut nalunaarsorsimasut pilersoqatigiittussaaneq malittussaavaat, aappariittut nalunaarsorsimasussaannermut inatsisip Kalaallit Nunaannut atortussanngortitaanerani § 3 naapertorlugu.

Ikiorsissutit naatsorsorneqarneranni, takuuk siunnersuummi § 12, aappariit marluullutik ani-ngaasaqarnikkut inissisimanagerat eqqarsaatigineqassaaq, pilersuinermut akiligassanullu aalajangersimasunut pisortanit ikiorsiissuteqartarnej naapertorlugu. Aappariit, aappariinnut inatsimmi aalajangersakkat malillugit imminnut pilersoqatigiittussaasut aamma pisortanit ikiorsiissuteqartarnej pillugu inatsisartut inatsisaanni pilersoqatigiittussaapput, taamalu pilersuinermut akiligassanullu aalajangersimasunut pisortanit ikiorsiissutit annertussusilernejarneranni aappariit isertitaat aallaaviusussaalluni. Tamanna atuutissaaq aappariit najugaqatigiikkunnaarsimagaluarpataluunniit.

Meeqqanut 18-it inorlugit ukiulinnut pilersuisussaataitaanerup inatsimmi §§ 13 aamma 14, meeqqat inatsisitigut pisinnaatitaaffii, malittussaavai.

Imm. 2-mut tunngasoq

Aapparisamut pilersuisussaataitaaneq siusinnerpaamik atorunnaassaaq pisussaaffilernejarnikkut imaluunniit averusernermik aalajangersaasoqarpat, tamannalu pitinnagu katissimasutut aappariinneq atuutissaaq.

Imm. 3-mut tunngasoq

Meeqqamut pilersuisussaataitaaneq atorunnaarsitaagaangat kommunalbestyrelsip angajoqqaat aningaasarnerannik naatsorsuinerminni ikiorsiissutinillu tunniussinerminni meeqqat eqqarsaatigissariaqanngilaat. Meeqqamut pilersuisussaataitaaneq atorunnaarnera isumaqarpoq kommunalbestyrelsip meeqqamut ikiorsiissutinik tunniussinermi naatsorsuinermilu angajoqqaajusut aningaasaqarnikkut inissisimanagerat eqqarsaatigisassanngikkaa. Angajoqqaat meeqqamut pilersuisussaataitaqqilersarput meeraq aapparisaminut meeqqaminulluunniit pilersuinissamut akisussaajunnaaraangat.

§ 3-imut

Aalajangersakkap peqqussummi atuuttumi § 1 assigaa.

Aalajangersakkami aalajangiunneqarpoq kikkut tamarmik Kalaallit Nunaanni najugaqartut pisortanit ikiorserneqarsinnaasut, tassanngaannartumik pisariaqavissumik pissaaleqilernermi imminut ilaquttanilluunniit pilersuisinnaajunnaarsimagaangamik.

Tassanngaannartumik pisariaqavissumik ikiorserneqartariaqalersutut inissisimaneq tassaavoq naatsorsuutiginnisamik pisoqarnera, taamalu ikiorserneqanngikkaanni ilaqqat perlertinneqarsinnaanerat aamma/imaluunniit najugaqarfissaqannginnerat imaluunniit allatut pissaaleqilersimanagerat.

§ 4-imut

Aalajangersakkap peqqussummi atuuttumi § 2 assigaa.

Imm. 1-imut tunngasoq

Pilersuinermit akiligassanullu aalajangersimasunut pisortanit ikiorsiissutinik immikkut ittumik pisoqartillugu pissagaanni, soorlu kapitel 6-imi allassimasutut, qinnuteqartoq Kalaallit Nunaanni aalajangersimasumik najugaqartuusaaq inuillu allattorsimaffianni najugaqartutut allassimassalluni. Najugaq aalajangersimasoq tassaavoq akulikitsumik siniffiusartoq, sulin-ngiffeqarneq, suliffimmut atasumik angalaneq, napparsimaneq assigisaaluunniit pissutigalugit qimassimagallanngikkaanni, pigisanillu uninngatitsiviusoq.

Aammattaaq pineqartoq danskisut innuttaassuseqanngikkuni, danskisut innuttaassusilimmut katissimasuusaaq imaluunniit kingullermik katitaa taamatut innuttaassuseqartussaalluni imaluunniit nunat tamalaat akornanni isumaqatigiissutit malillugit pilersuinermit akiligassanullu aalajangersimasunut ikiorsiissutisisinnaatitaassalluni.

Inuit danskisut innuttaassuseqanngitsut, danskisut innuttaassusilimmut katissimanngitsut imaluunniit kingullermik katinnermini taamatut innuttaassusilimmut katissimanngitsut imaluunniit nunat tamalaat akornanni isumaqatigiissutit malillugit ikiorsiissutisisinnaatitaanngitsut, pilersuinermit akiligassanullu aalajangersimasunut pisortanit ikiorsiissutinik kiisalu immikkut ittumik pisoqartillugu ikiorsiissutinik pisinnaanngillat. Inuit danskisut innuttaassuseqanngitsut imm. 1-imilu piunasaqaatinik taakkartorneqartunik naammassinninngitsut pilersuinissamut akiligassanullu aalajangersimasunut pisortanit ikiorsiissutinik kiisalu immikkut pisoqartillugu ikiorsiissutinik pisinnaanngillat.

Pilersuinermit akiligassanullu aalajangersimasunut pisortanit ikiorsiissutit tassaapput akissarsiatigut isertitanut taarsiullugit ikiorsiissutit, aammalu tassaallutik tassanngaannartumik pilertortumik ikiorsiissutinut taarsiullugit tunniunneqartartut. Pisortanit ikiorsiissutit tamatigut utaqqiisaagallartumik ikiorsiissutaasutut isigineqartarput.

Imm. 2-mut tunngasoq

Pilersuinermit akiligassanullu aalajangersimasunut pisortanit ikiorsiisoqarsinnaanngilaq qinnuteqartup pisariaqartitai tunniuttakkatigut allatigut matussuserneqarsinnaasimappata. Tamatumani atuupput namminersortuni aamma pisortani qinnuteqartup isertitarisinnaasai sulluunniit tamarmik. Namminersortuni aamma pisortani isertitat assersuutigalugu tassaasinnaapput kingornussarsiat, akissarsiat, pisortanit pensionisiat, piginnaanngorsaaqqinnermi ikiorsiissutit, ilinniagaqarnersiutit, suliffeqanngikkallarnermi tapiissutit assigisaaluunniit.

Aalajangersakkami aalajangersarneqarpoq inuit taaneqartunik tapiissutisisartut peqatigisaanik pisortanit ikiorsiissutit pillugit inatsisartut peqqusutaat malillugu

ikiorsiissutisiaqarsinnaan-ngitsut. Assigisaannilluunniit tapisiani pineqarput assersuutigalugu pikkorissarnermi tapisiat.

§ 5-imut

Imm. 1-imut tunngasoq

Qinnuteqaat qinnuteqartup najugaqarfigalugu kommuuniani kommunalbestyrelsimut tunniunneqassaq. Qinnuteqartup aamma maleruagassat atuuttut malillugit qinnuteqaatini najugaqarfigalugu kommunimini kommunalbestyrelsimut tunniuttussaavaa, maannakkulli siunnersuummi tamanna takuneqarsinnaalerpoq. Qinnuteqaat oqaloqatiginnikkut allakkatigulluunniit tunniunneqarsinnaavoq, qinnuteqartup periarfissamik sorlermik toqqaarusunnera aallaavigalugu.

Imm. 2-mut tunngasoq

Tassanngaannartumik pilertortumik ikiorneqarnissamik qinnuteqaat najugaqarfigalugu kommuunimi kommunalbestyrelsimut tunniunneqassaaq. Qinnuteqaat oqaloqatiginnikkut allakkatigulluunniit tunniunneqarsinnaavoq, qinnuteqartup periarfissamik sorlermik toqqaarusunnera aallaavigalugu.

§ 6-imut

Nr.1-imut 2-mullu tunngasoq

Pisortanit ikiorserneqarnissamut piunasaqaataavoq qinnuteqartup inooqatigiinnermi pisimasumik nalaataqarsimanissaa. Taamaalilluni naammakkunnaarpoq nikerartumik isertitaqarsimanerup aqussinnaasimannginnera.

Qinnuteqartup atugaanik naliliinermi pingaaruteqaarpoq inooqatigiinnermi pisimasumik nalaataqarsimaneq, qinnuteqartup inuuniarnermi atugarisaatigut allangortoqarsimanera allannguutaasorlu tunngavigalugu imminut ilaqtutaminillu pilersuisinnaajunnaarsimanera.

Aalajangersakkami assersuusiaqarpoq allannguutit nalinginnaasut suusinnaanerinik, imaattunik napparsimalersimaneq, ernereernerme sulinnigiffeqarneq, suliffissaaleqineq inooqatigiinnerullu taamaatinneqarnera. Pisariaqavissumik pilertortumik ikiorsiissutit annikinnerpaaffissaminniittuummata, annertusaaniarnissaq naammangilaq. Imaappoq arlalippassuartigut ataasiakkaat pissutsinik atugaannik naliliisoqartariaqarpoq. Assersuutigalugu pisut najoqqutaralugit pineqaatissinneqarsimasunut inissiisarfimmut inissinneqartup ilaqtai pisortanit ikiorsiissutinik tunineqarsinnaapput. Aamma sulinerme ajoqusertoqarnerani pisortanit ikiorsiissutinik tunisisoqarsinnaavoq, sulinerme ajoquserneq napparsimanermik kinguneqartarmat, taannalu § 6-imi ilanngunneqarsimalluni.

Kommunalbestyrelsimit naliligassaavoq qinnuteqartut ataasiakkaat pissutsit nalaataat, taamalu naliligassaalluni qinnuteqartup inuttut inuunerani allannguutit ikiorsiinissamut tunngaviliinersut. Aalajangiisuussaaq qinnuteqartut

inooqatigiinnermi nalaatanit patsiseqartumik pilersuinnermut tunngasut kalluarneqarsimanersut, tamatuma kingunerisaanik qinnuteqartoq imminut ilaqttaminillu pisariaqartitaminnik pilersorsinnaajunnaarlutik. Aammattaaq piunasaqaataavoq qinnuteqartup imminut ilaqttaminillu allatigut pisariaqartinneqartumik pilersuisinnaanera akiligassanillu aalajangersimasunik akilersuisinnaanera pisinnaangitsoq. Ikiorssiissutit tassaapput allanit namminersortunit pisortanillu pilersorneqarsinnaanermut taartaasut. Pisarialittut akiligassatullu aalajangersimasutut pineqarput inigisamut, nerisaqarnermut, kiassarnermut, innaallagissamut, atisanut allanullu tunngaviusumik pisariaqartitanut aningaasartuutit.

Allannguutit siumut takuneqareersinnaangitsut allannguutaasussatullu naatsorsuutigisariallit pisortanit ikiorssiissutisinnissamut tunngaviliisinnaapput.

Allannguutit qinnuteqartup imminut ilaqttaminillu pilersuisinnaassusianik ajorseriartitsin-ngippata, pisortanit ikiorssiissutinik tunniussisoqarsinnaangilaq. Assersuutigalugu akissarsiortoq napparsimanermi nalaani tamakkiisumik aningaasarsiaqarsinnaatitaasoq pilersuinnermut akiligassanullu aalajangersimasunut pisortanit ikiorssiissutisinnaatitaangilaq, napparsimanerup kinguneranik imminut pilersorsinnaassuseq annaaneqanngimmat.

Inuit nikerartumik isertitaqarfiusumi inuussutissarsiutillit nalinginnaasumik aamma ikiorssiissutisinnannaviangillat. Pissutsini arlalinni allannguutitut taaneqarsinnaangitsoqartussaavoq, assersuutigalugu akiligassat aalajangersimasut qaffannerat ikiorssiissuteqarnissamut tunngavissinnaviangilaq.

Inuup katinnera aamma allannguutitut ikiorssiissutinik tunineqarsinnaalersitsisutut taaneqarsinnaangilaq. Katinnermi atuutilertarpoq aappariittut aapparmik pilersuisussaataalerneq tamannalu uimut nuliamulluunniit atuuppoq. Pingaarnepaavoq pineqartoq katinngikkallarami ikiorssiissutinik pisinnaasimanersoq imaluunniit katinnerup kingorna allanik allannguutinik pisoqarsimanersoq ikiorssiissutinik pinissamut tunngaviliisunik.

§ 7-imut

Imm. 1-imut tunngasoq

Aalajangersakkami aalajangerneqarput, siunnersuummi § 6-imi taaneqartut saniatigut, pilersuinissamut akiligassanullu aalajangersimasunut kiisalu ataasiaannartumik aningaasartuutitut pisortanit ikiorserneqarnissamut piunasaqaatit. Piunasaqaataavoq sulilernissamut piareersimasuunissaq imaluunniit sulilernissamut piareersimanngitsutut ernereernerulluunniit kingorna sulinnigiffeqartutut nalilerneqarsimanissaq.

Imm. 1-imi nr. 1-imut tunngasoq

Piunasaqaataavoq pisortanit ikiorssiissutinik pisartagallip sulilernissamut periarfissaminik atorluaasuunissaa. Tamanna ima isumaqarpoq pineqartup pisussaaffigigaa suliffissarsiortuunissani aammalu suliffissamik neqeroorutinik

suliassaqartinneqarnissamillu neqeroorutinik akuersaartarnissani. Pisortanit ikiorsiissutinik pisartagalik suliffissaqartitsiniarnermi sulilersinneqarsinnaasariaqarpoq, piaartumillu sulilersinnaasariaqarluni. Taamaammatt pineqartoq allami suliffeqarsinnaanngilaq atorfeqarluniluunniit. Aningaasarsiasat tunniunneqannginneranni pineqartup suliffissarsioruuneranik taamalu suliffissaqartinneqanngikkallarnernanik uppersaammik tunniussisoqarsimassaaq.

Kommunalbestyrelsip naliliiffigisussaavaa suliffissamik neqeroorut naapertuuttuunersoq. Naliliinermut tassunga aallaaviusussaavoq pisortanit ikiorsiissutisissap killissinnaasaanik missingersuineq. Inuup pisortanit ikiorsiissutinik pisartagallip kinguneqanngitsumik suliffissamik neqeroorut itigartiinnarsinnaanngilaa assersuutigalugu patsisigalugu siusinnerusukkut aningaasarsiarisimasaminut naleqqiullugu akissaatikinnerusoq imaluunniit suliffissaq pineqartup nalinginnaasumik suliassaqarfata iluaniittuunngitsaq, soorlu siornatigut suliffigisimasamut, ilinniakkamut assigisaanulluunniit naleqqiullugu. Pineqartup suliffissaq killissinnaaguniuk neqeroorummik akuersaartariaqarpoq.

Suliffimmut tunngatillugu pissutsit aalajangersimasut imaluunniit pisortanit ikiorsiissutisissartup inuttaanut tunngasortai pissutaallutik imaassinnaavoq suliffissaq naapertuutinnigitsaq. Assersuutigalugu suliffiup nukersornartuunera pineqartumik artukkiisinnaavoq.

Suliffik naapertuuttuussaguni inigisamiit naapertuuttumik ungasissusilimmiittariaqarpoq imaapporlu angallavissaq naapertuuttuusariaqartoq. Kommunalbestyrelsip pissutsini ataasiakkaanni suna naapertuuttuunersoq missingersortartussaavaa.

Imm. 1-imi nr.2-mut tunngasoq

Inuup sungiussiniarnermik ajornartorsiuteqarnera ima paasisariaqarpoq suliffimmi malittarisassanik sungiukkuminaatsitsisoq, soorlu qassinut suliarternissaq ullullu tamaasa aalakoornani suliarternissaq eqqarsaatigalugit.

Imm. 1-imi nr.3-mut tunngasoq

Ernereernerup kingorna sulinngiffeqartut amerlanerit naartunermi, ernineri qitornavissiartaarnermilu sulinngiffeqarnermut ullormusiaqarnermullu inatsisartut peqqussutaanni malittarisassat naapertorlugit pisinnaatitaaffeqarput. Inuilli pisortanit ikiorsiissutinik pisartagallit naartunermi, ernineri qitornavissiartaarnermilu sulinngiffeqarnermut ullormusiaqarnermullu peqqussut naapertorlugu pisartaqarsinnaanngillat, kisiannili pilersuinermit akiligassanullu aalajangersimasunut pisortanit ikiorsiissutinik pisinnaallutik, pisortanit ikiorsiissuteqartarnermut inatsisartut peqqussutaat malillugu. Ernereernerup kingorna sulinngiffeqartoq sulinngiffeqarfissaq naallugu sulisinnaanngitsutut isigineqartarpoq, ernereernerup kingorna sulinngiffeqarnissamut malittarisassat atuuttut malillugit.

Inuk napparsimanini pissutigalugu suliffimminik paarsinnaanngitsaq pilersuinermit akiligassanullu aalajangersimasunut pisortanit ikiorsiissutinik pisartaqarsinnaavoq.

Imm.2-mut tunngasoq

Naalackersuisut pisinnaatitaapput pilersuinnermut akiligassanullu aalajangersimasunut pisortanit ikiorsiissuteqartarnermi kiisalu ataasiaannartumik ikiorsiissuteqartarnermut piumasaqaatit pillugit sukumiinerusumik malittarisassiornissaminut. Immikkut eqqarsaatigineqarsimavoq aningaasanik tigusartakkanik pinissamut piumasaqaatit suunerinik allakkiortoqarnissaa. Naalackersuisuttaaq sukuminnerusumik malittarisassiuussinnaavaat pisortanit ikiorsiissutinik pisartagalik qaqugukkut sungiussiumaataarnini pissutigalugu sulisinnaangitsutut naliliiffigineqartassanersoq.

Nalunaarut suliarineqartussaavoq, tassanilu pilersuinnermut akiligassanullu aalajangersimasunut pisortanit ikiorsiissutisisarnermi ataasiaannartumillu aningaasartuutitut ikiorsiissuteqartarnermi piumasaqaatit erseqqissarneqartussaallutik. Nalunaarut atuutilersinneqartussaavoq inatsisartut peqqussutissaattut siunnersuutip atortussanngortinneqarnera ilutigalugu.

§ 8-imut

Siunnersuummi erseqqissarneqarpoq pisortanit ikiorsiissutinik piniarluni saaffiginninnermi siullermi pineqartumik innersuussineq pisassasoq, taamaalilluni qinnuteqartumut ikiorsiineq naleqqunnerpaaq innersuunneqarsinnaaqqullugu. Siunertarineqarpoq inuit suliffissaaleqisut, imaasiallaannarlutik suliffeqalersinnaasut, aamma suliffissaaleqisut piviusumik suliffeqalernissamut piareersimanngitsut, pingaarnertut inooqatigiinnermi peqquteqartumik immikkoortinneqassasut, taamaalilluni inuit sulisinnaangitsut pilersuinissamut akiligassanullu aalajangersimasunut pisortanit ikiorsiissutinik annerusumik tigusisassallutik.

Kommunalbestyrelsit aamma ullumikkut pisortanit ikiorserneqarnissaq pillugu saaffiginnittoqartillugu isumaliuutigisussaavaat ikiorsiinissaq naleqquttooq qinnuteqartumut ikiorsiissutigineqarnera.

§ 9-imut

Imm. 1-imut aamma 2-mut tunngasoq

Siunnersuummi § 9 § 8-mut §10-mullu attuumassuteqartutut isigineqassaaq, taakkunani isiginiarneqarlutik sulilersitsinarneq inuttullu ineriartorneq.

Kommunalbestyrelsip nammineq aqqissuutissava ilitsersuineq qanoq kimillu ingerlanneqassanersoq. Siunnersuinerup siunertarissavaa pisortanit ikiorsiissutisisartup nammineerluni inuunerminik akisussaaffeqarnerminik paasinninnissaa nammineerlunilu ajornartorsiutiminit aaqqiisinnaanngornissaa, taamaalilluni siunissami imminut ilaqtutaminillu pilersuisinnaalissalluni. Inuussutissarsiutitigut ilitsersuinerup saniatigut siunnersuineq pisariaqartitsineq naapertorlugu ilaqartinneqarsinnaavoq inuttut ineriartornissamik, tassunga ilanngullugu imigassamut katsorsartinneq.

Assersuutigalugu tamanna pisinnaavoq ilinniarfissamut periarfissat pillugit siunnersuisarfik suleqatigalugu.

Imm. 3-mut tunngasoq

Nutaatut siunnersuineq kisermaanut imaluunniit ilaqutariinnut meeralinnut immikkut ittumik ikiorsiinertut neqeroorutigineqarsinnaavoq. Siunnersuutip kingunerisaanik ilaqutariit meerallit isiginiarneqarput, taamaalilluni kommunalbestyrelsip ilaqutariit piffissami ajornartorsiorfianni tapersorsorlugillu ikiorsinnaassallugit, taamaalillutillu meeqqat sumiginnagaanissaat pitsaaliorneqarluni. Taamatut pisoqartillugu kommunalbestyrelsimut saaffiginninnermi siullermi siunnersorneqarnissamut piffissamik isumaqatigiissusiortoqartariaqarpoq.

§ 10-imut

Paragraffimi tassani aalajangersakkat ataasiakkaat iliuusissatut pilersaarusiunneqarnissaannut tunngasup annersaasa assigai suliffeqanngikkallarnermi tapiissutit pillugit inatsisartut peqqussutaanni nr. 5-imi, 1. juni 2006-imeersumi § 6-imi aalajangersakkat. Ilaqutariinnermut Pisorta qarfiup Suliffeqarnermut Pisorta qarfik suleqatigalugu suliarai iliuusissatut pilersaarutitut qarasaasiakkut immersugassaliorneq. Naatsorsuutigineqarpoq iliuusissatut pilersaarutit assigiit suliffeqanngikkallarnermi tapiissutitut kiisalu pisortanit ikiorsiissutitut atorneqartassasut.

Imm. 1-imut 2-mullu tunngasut

Pilersuinnermut akiligassanullu aalajangersimasunut pisortanit ikiorserneqarnissamik qinnuteqartup pisinnaatitaaffigaa imminut tunngasumik iliuusissatut pilersaarusiortoqarnissaa. Iliuusissatut pilersaarutip pineqartumut anguniagassatut aalajangiunneqarsimasut qinnuteqartumut aamma kommunalbestyrelsimit erseqqissaatigineqarlutillu aalajangiussimaneqassapput. Siunnersuutigineqarpoq suliffeqanngikkallarnermi tapiissutit pillugit inatsisartut peqqussutaannut atugassatut iliuusissatut pilersaarusiortat atorneqartassasut.

Pilertortumik pisarialimmik, takuuk § 6, pisortanit ikiorsiissutinik tunniussinnermut atatillugu iliuusissatut pilersaarusiortoqartassanngilaq.

Kommunalbestyrelsip akisussaaffigaa saaffiginnittunut suliniutinik pingaarnersiutinissani.

Kommunalbestyrelsip isumagissavaa pisortanit ikiorsiissutinik pisartagaqarneq aallartikkaa-ngat piaarnerpaamik ataasiakkaanut iliuusissatut pilersaarusiortoqartarnissaa.

Ikaarsaariarnerup nalaani annikitsumik aporfeqarnissaq naatsorsuutigineqarpoq pilersuinnermut akiligassanullu aalajangersimasunut pisortanit ikiorsiissutisartut tamarmik massakkut iliuusissatut pilersaarusiunneqartussaammata. Tamatumali kingorna suliffissaaleqisup saaffiginninnerata kingunitsianngua iliuusissatut pilersaarusiortoqartalernissaa naatsorsuutigineqarpoq, peqqussut atuutilerpat

saaffiginnissutit ingerlaannartalissammata suliffissaaleqisutut nalunaarsorneqaannaratik.

Ungasinnerusoq isigalugu pisortanit ikiorsiissutisisartut amerlanerpaatigut iliuusissatut pilersarusiuunneqareersimassapput, suliffeqanngikkallarnermi tapiissutinik pisartagaqarunik. Pisortanit ikiorsiissutisisartut amerlanersaat suliffeqanngikkallarnermi tapiissutinik aallaqqaammut pisartagaqartuusimapput.

Pisortanit ikiorsiissutinik pisartagallip ataasiakkaatut iliuusissatut pilersarusiuunneqarneq peqataaffigisariaqarpaa, peqqussutip siunertarimmagu pisortanit ikiorsiissutisisartup imminut pilersortussaanerminik akisussaasutut misigisimalersinnissaa, susinnaanngitsutut pilersorneqaannarani.

Imm. 3-mut tunngasoq

Inuilli annerpaamik ulluni 14-inik sivilissuseqaannartumik pilersuinnermut akiligassanullu aalajangersimasunut pisortanit ikiorsiissutinik pisariaqartitsillutik saaffiginnittut iliuusissatut pilersarusiuunneqartassanngillat. Matumani eqqarsaatigineqarpoq pilersuinnermut akiligassanullu aalajangersimasunut pisortanit ikiorsiissutinik pisariaqartitsinerup sivikitsuinnaanissaata naatsorsuutigineqarnera, taamalu ataasiakkaanut iliuusissatut pilersarusiortoqarnissaanut piffissaqarani. Siunertamut tulluartaunaviannigilaq ataasiakkaanut iliuusissatut pilersarusiornissaq asuli aningaasartuutigissallugu, ilisimareeraanni ataasiakkaat iliuusissatut pilersarusiuunnerat akilersinnaanaviannigisoq.

Ullulli 14-it qaangiunneranni paasinarsippat pilersuinnermut akiligassanullu aalajangersimasunut pisortanit ikiorsiissutisisartuq suli pilersorneqartariaqartoq suliffissaaleqisut allat pisortanit ikiorserneqartartut assigalugit pisinnaatitaavoq iliuusissatut pilersarusiuunneqassalluni.

Imm. 4-mut tunngasoq

Pilersuinnermut akiligassanullu aalajangersimasunut pisortanit ikiorsiissutisisartuq inatsisiliornerit allat tunngavigalugit tapiissutinik allanik iliuusissatut pilersarusiornermik piumasaqaateqarfiusunik pisartagaqalerpat iliuusissatut pilersaarut malinnaatinneqassaaq. Matumani eqqarsaatigineqartoq tassaavoq suliffeqanngikkallarnermi tapiissutisisarneq pillugu inatsisartut peqqussutaat.

Pilersuinnermut akiligassanullu aalajangersimasunut pisortanit ikiorsiissutisisartuq piginnaanngorsaaqqinneq pillugu inatsisartut peqqussutaat malillugu tapiissutinik pisartagaqalerpat piginnaanngorsaaqqinnermut pilersaarut pineqartumut iliuusissatut pilersaarutaareersumut naleqqersuunneqassaaq. Taamaattumik kommunalbestyrelsip isumagisassaraa pilersuinnermut akiligassanullu aalajangersimasunut pisortanit ikiorsiissutisisartumut iliuusissatut pilersaarutip ingerlateqqinnissaa, taamaalilluni iliuusissatut pilersarusiornermut nutaamut piffissaq nukiillu atulussinnarneqannginniassammata.

Imm.5-imut tunngasoq

Aammattaq malittarisassatigut aalajangersarneqarpoq pisortanit ikiorsiissutisisartup kommuunit akornanni nuunnerani iliuusissatut pilersaarutip

malinnaatinneqartarnissaa. Taamatut malittarisassiortoqarpoq iliuusissatut pilersaarusiormi allaffissornikkut aningaasartuutit sipaarniarlugit. Malittarisassap isumagaattaaq pisortanit ikiorsiissutisisartup kommuunimut allamut nuunnerani suliap aallaqqaataanit ingerlanneqartannginnissaa, killiffilli aallaavigalugu iliuusissatut pilersaarutip ingerlateqqinneqartarnissaa siunnerfiulluni. Taamatullu sulilersitsiniarneq pisariaqanngitsumik kinguarsarneqartassanngilaq.

Imm. 6-imut tunngasoq

Naalackersuisut ataasiakkaanut iliuusissatut pilersaarusiormut atatillugu erseqqinnerusumik malittarisassiorsinnaapput. Nalunaarutip siunertaraa iliuusissatut pilersaarusiormi kommuunit assigiinnik malittarisassaqaarnissaat.

§ 11-imut

Imm. 1-imut tunngasoq

Iliuusissatut pilersaarut pisariaqartitsineq naapertorlugu iluarsaanneqarlunilu naliliiffigineqaqqissinnaavoq. "Pisariaqartitsineq naapertorlugu" isumaqarpoq iliuusissatut pilersaarut iluarsaanneqarlunilu naliliiffigineqaqqittassasoq pisortanit ikiorsiissutisisartup atugarisai allannguuteqarpata, iliuusissatut pilersaarummut aalajangersarneqareersumut sunniuteqartumik. Iliuusissatut pilersaarutip malitseqartinneqannginnera inatsisitigut iliuitsinik malitseqartussaannngilaq.

Aalajangersakkami aalajangersarneqarpoq iliuusissatut pilersaarusiormik malitseqartitsinissamut kommunalbestyrelsi akisussaasuusoq. Iliuusissatut pilersaarut pimoorussinermi sakkuussaaq, ingerlaavartumik ineriartortinneqartoq nalilersorneqartorlu. Iliuusissatut pilersaarut naliliiffigineqaqqittariaqarpoq atugarisatigut allannguuteqartoqarpat imaluunniit pikkorissartitsineq isumaqatigiissutaareersoq ingerlanneqareersimappat.

Ingerlaavartumik malitseqartitsinermut atatillugu ikiorserneqartup peqataatinneqarnissaa imaluunniit allakkatigut ilisimatinneqartarnissaanut piumasqaateqanngilaq. Taamaalilluni malitseqartitsinissap qanoq aaqqissuunneqarnissaa pillugu kommunalbestyrelsi aalajangiisussaavoq, tassunga ilanngullugu ikiorserneqartoq peqataatinneqassanersoq aamma tamanna qanoq ingerlanneqassanersoq. Malitseqartitsinerup ilusaanut suliami ataasiakkaami pissutsit apeqqutaapput. Kommuunini suleriaatsit tunngavigalugit piumasqaataanngilaq pisortanit ikiorsiissutisisartup iliuusissatut pilersaarutip naliliiffigineqaqqinnerani tamatigut akuliutinneqartarnissaa. Tassunga tunngatillugu kommunalbestyrelsip nammineq missingersuusiussavaa pisortanit ikiorsiissutisisartup qaqugukkut akuliutininnissaata pisariaqarnersoq.

Imm. 2-mut tunngasoq

Assersuutigalugu pisortanit ikiorsiissutinik pisartagallip suliffissamik neqeroorutigineqartumik itigartitsisimanagera pissutigalugu kommunalbestyrelsip pisartakkat ikilisissimappagit, qaammatip ataatsip qaangiunnerani kommunalbestyrelsip misissortussaavaa suli suliffissamik neqerooruteqartoqarnersoq pisartagallip suliffigiumanngisaanik assigisaanilluunniit.

§ 12-imut

Imm. 1-imut tunngasoq

Tunngaviusoq tassaasoq pisortanit ikiorsiissutip annertussusilerneqarnerani ataasiakkaani tamani naliliinikkut, qinnuteqartup pilersuinissamut pisussaaffii, katissimallugu aapparissamut, aappatut nalunaarsorneqarsimasumut, takuuk § 2, imaluunniit naligisatut inooqammut, takuuk § 12, imm. 6, isertitai, aalajangersimasumik aningaasartuutai, maannamut inuuniarnermini atugarisimasai aammalu najukkami pissutsit tunngavigalugit aalajangersaasarnissaq peqqussummit atuuttumit ingerlateqqinneqarpoq. Maannamut inuuniarnermi atugassarisanik naliliinermi eqqarsaatigineqartussaapput pisartagaqartup siornatigut akiligassaasa aalajangersimasut annertussusii. Tamanna assersuutigalugu uppersarneqartassaaq akissarsiat allagartaasigut aningaaserimmiillu nalunaarsuutinit. Aammattaaq najukkami pissutsit eqqarsaatigineqartassapput. Imaappoq pineqartup inuuniarnermini atugarisai kiisalu illoqarfimmi nunaqarfimmiluunniit najugaqarfiusumi aningaasartuutitut tunngasut.

Imm. 2-mut tunngasoq

Inigisamut aningaasartuutit naapertuuttut taamaallaat pisortanit akilerneqartassapput. Inigisamut aningaasartuutitut naapertuuttut missingersuutitut aalajangersaanermi toqqammavigineqartassaaq ilaqutariit assigisaanik inoqutigiiusut pisortat inissiaataanni attartortittakkani najugallit, taamatut atsigisumik initalimmut akiliutigisartagaat nalinginnaasut. Taamaammat imaassanngilaq ilaqutariit inigisami akisoorsuarmi imaluunniit inuk BSU-mik illumi najugalik, piginneqatigiilluni inissiami imaluunniit nammineq pigisatut inissiami najugaqartut akiliunneqartassasut. Pisortanit ikiorsiissutinik tunniussisarnermi isumaavoq ikiorsiissutisip illup tuninerani akiligassat peereerlugit iluanaaruteqarsinnaanissaa. Kommunalbestyrelsip nammineq naliliiffigisassavaa inigisamut akiliutit naapertuuttut isummerfiginissaat.

Pisortanit ikiorsiissutinik pisartagalik piginneqatigiilluni inissiami imaluunniit nammineq pigisamik inissiami najugalik akiligassanut aalajangersimasunut pisortanit ikiorsiissutinik tunniunneqartut saniatigut aningaaserivimmut atorniartariaqarpoq inissiamut aningaasartuutissat matussuserniarlugit. Taamatut ikiorserneqarnermi pisortanit ikiorsiissutit utertitassat atorniarneqarsinnaanngillat.

Atuisutut akissaajaatit qanoq atutigineq naapertorlugu akilersorneqartarput, soorlu innaallagissamut, imermut kiassarermullu. Akiligassanut aalajangersimasunut aningaasartuutit tassaapput pisariaqartunut aningaasartuutit, tassunga ilanngullugu nerisassanut, atisanut, paaqqinnittarfinnut sillimmasiissutinullu.

Imm. 3-mut tunngasoq

Pilersuinnermut akiligassanullu aalajangersimasunut pisortanit ikiorsiissutit annertussusilerneqartarput ikiorsiissutisartup aningaasartuutivii tunngavigalugit kiisalu najugaqatigiinnerup iluaqutissartarisinnaasai aallaavigalugit. Akiligassaviit suunerinik aalajangersaanermi aallaaviusarpoq akiligassat aalajangersimasut, takuuk imm.2, inigisamut akiliutit, atuisutut akissaajaatit akiligassallu allat

aalajangersimasut, pineqartumit uppersarsarneqarsinnaasut. Uppersarsaaneq pisassaaq akiligassanik aningaaserivimmiillu uppersarsaatnik takutitsinikkut.

Aammattaaq najugaqatigiittuusinnaanerup iluaqutissartai eqqarsaatigineqartassapput. Tamatumani eqqarsaatigineqartoq tassaavoq katissimallutik aappariit inooqatigiillu inigisamut, imermut, innaallagissamut assigisaanullu akiligassanik avitseqatigiissinnaanerat.

Aalajangersakkami siunnersuutigineqarpoq pilersuinermit akiligassanullu aalajangersimasunut pisortanit ikiorsiissutit annertunerpaaffissaat SIK-p aamma Naalackersuisut isumaqatigiissutaat naapertorlugit suliamik ilinniagaqarsimanngitsut aningaasarsiaasa minnerpaat 65 %-iattut annertussilerneqassasut. Pissarsiassat annertussilerneqarneranni eqqarsaataavoq ataasiakkaat sulisinnaanerisa akilersinnaasuuaannarnissaa. Annertunerpaaffissiineq malittarisassaavoq pingarneq pissutsillu immikkut ittut atuutsillugit 65 %-imik amerlanerusunik ikiorsiisoqarsinnaavoq, takuuk imm. 4.

Ukiuni nutaamik isumaqatiginninniarfiusuni nalunaaquttap akunneranut akigitinneqartoq aatsaat tamanut saqqummiunneqarsinnaavoq isumaqatigiissut atsiorneqareerpat. Tamanna pitinnagu akiligitinneqartoq pisoqat atorineqartussaavoq.

Imm. 4-mut tunngasoq

Pisuni immikkut ittuni kikkut tamarmik naammaqqaannartumik inuussutigisinnaasaqarnissaat qulakkeerniarlugu aningaasarsiat minnerpaat 65%-iinik annertunerusumik ikiorsiisoqarsinnaanera periarfissinneqarpoq. Pisut immikkut ittut eqqarsaatigineqarput qinnuteqartup taassumalu ilaqutaasa pilersorneqarnerisa akiligassallu aalajangersimasut qulakkeerneqartariaqarneri, ilaqutariillu aalajangersimasumik aningaasartuutaat naammaginartumut appartinneqarsinnaanngippata. Assersuutigalugu ilaqutariinni sukkorneq assigisaaluunniit pissutigalugit immikkut ittumik nerisaqartariaqarneq imaluunniit ilaqutariit inissiami akisuallaartumi najugaqarpata kommunalbestyrelsilu inissiamik akikinnerusumik neqerooruteqarsinnaasiman-ngippat.

Akissarsiat minnerpaat 65%-iannik annerpaaffissaliineq isumaqanngilaq inuit inigisaq inuuniarnerlu eqqarsaatigalugit naapertuuttumik periarfissinneqarsinnaanngitsut.

Imm. 5-imut tunngasoq

Siunnersuummi ingerlateqqinneqarpoq maannakkut aalajangersagaq, qinnuteqartoq nammineq pisuussutigisaminik pissaaleqilersimappat, taava qinnuteqartoq taamaallaat pisortanit ikiorsiissutisiassatut pisinnaasaraluata affaa pisortanit ikiorsiissutigineqarsinnaasoq.

Pissaaleqilerneq nammineq pisuussutigineqartutut isigineqartarpoq qinnuteqartoq nammineerluni suliffimmit soraarniuteqarsimappat imaluunniit pisuussutigisaminik soraarsitaasimappat, assersuutigalugu pissutissaqanngitsumik sulinnitsoorsimaneq pissutigalugu. Aningaasan-ngornagit ikiorsiissutit

tunniunneqassapput qinnuteqartumut allattuganngorlugu, pisiniarfimmi naleqquttumi pisissutigineqarsinnaasumik.

Taamatut pisoqartillugu kommunalbestyrelsip naliliinermini eqqarsaatigisussaavai meerartaasinnaasut pisariaqartitaasa suuneri. Meeqqamut iluaqutissat tamatigut pingaarnerusartussaapput.

Imm. 6-imut tunngasoq

Inooqatigisaq katissimallugu aapparisatut naligiisinneqassappat pineqartup minnerpaamik ukiumi ataatsimi pisortanit ikiorsiissutisartooq inuit allattorsimaffianni nalunaarsorneqarsimasumik najugaqatigisimasussaavaa. Illusisimasooq tassaanngilaq naligalugu inooqatigisaq.

Imm. 7-imut tunngasoq

Aammattaaq siunnersuutigineqarpoq Naalakkersuisut pilersuinermit akiligassanullu aalaja-ngersimasunut pisortanit ikiorsiisarneq pillugu malittarisassanik erseqqinnerusunik aalaja-ngersaasinnaasut, eqqarsaatigineqarluni pisortanit ikiorsiissut qanoq naatsorsorneqassanersoq pillugu malittarisassanik aalajangersaasoqarsinnaanera, ilanngullugu aningaasartuutinut sunut ikiorsiisoqarsinnaanersoq aamma qaqugukkut SIK-p aamma Naalakkersuisut isumaqatigiissutaat naapertorlugit suliamik ilinniagaqarsimanngitsutut aningaasarsiat minnerpaat 65%-iinit annertunerusunik ikiorsiisoqarsinnaassanersoq kiisalu qinnuteqartoq qaqugukkut nammineq pisuussutigisaminik pissaaleqilersimasutut isigineqarnissaanut malittarisassat.

§ 13-imut

Siunnersuutigineqarpoq pisortanit ikiorsiissutit saniatigut isertitaqarsinnaanerup akilersinnaanissaanut periarfissiisoqassasoq, tassami ulloq suliffigineqartoq imaluunniit aningaasat akiliutigineqartut annertoqataannik taamaallaat ilanngaassisoqassammat.

Assersuutigalugu inuk ulluni marlunni sulisimappat taava pilersuinissamut akiligassanullu aalajangersimasunut pisortanit ikiorsiissutit nalinginnaasumik ullut 14-it tunngaviginagit ullulli 12-it tunngavigalugit naatsorsorneqassapput. Pineqartoq taamaalilluni pilersuinissamut akiligassanullu aalajangersimasunut ullunut 12-inut taamaallaat ikiorserneqassaaq. Siunnersuummi annerpaamik tunniunneqarsinnaasut pillugit qummut killiliisoqarpoq, tassami pisortanit ikiorserneqarnissamut naleqqiullugu aalajangersimasumik suliffeqarneq tamatigut akilersinnaassammat.

Pilersuinermit akiligassanullu aalajangersimasunut pisortanit ikiorsiissutisartumut 5.000 kr.-it ullut 14-ikkuutaarlugit nalinginnaasumik tunniunneqartarpata ullunilu marlunni sulisimappat, pineqartup toqqarsinnaavaa 4.653 kr.-inik tunineqarnissani. Assersuutigalugu inuk ulluni marlunni sulinermini 500 kr.-inik akisarsisimappat aammalu pilersuinermit akiligassanullu aalajangersimasunut pisortanit ikiorsiissutinik ulluni 14-ikkuutaartunik 5.000 kr.-inik pisimalluni, pineqartup aamma toqqarsinnaavaa 4.500 kr.-it tunniunneqarnissaat.

Taakkuupput pilersuinnermut akiligassanullu aalajangersimasunut pisortanit ikiorsiissutaasartut maannakkutut aalajangersagaaneranni ingerlateqkitassatut siunnersuutigineqartut.

§ 14-imut

Siunnersuutigineqarpoq pilersuinnermut akiligassanullu aalajangersimasunut pisortanit ikiorsiissutit piffissami sivikinnerusumi pikkorissarnermi, katsorsartinnermi aamma fagini ataasiakkaani atuartitsinermi peqataanermi atuukkunnaarsinneqartassanngitsut, allaniit tapiissutisisoqanngippat, assersuutigalugu ilinniagaqarneriutit. Pikkorissarnerit tassaasinnaapput sivikinnerusumik sivilunerusumilluunniit ingerlanneqartussat.

Aalajangersakkap pisortanit ikiorserneqartartoq pikkorissarnissaanut periarfissaqalersippaa, taamaalilluni pineqartoq siunissami suliffeqalersinnaalluni suliffinilu attatiinnarsinnaallugu.

§ 15-imut

Nalornissutigineqarsimavoq piffissap qanoq ilineraniit pisortanit ikiorsiissutisisoqarsinnaanersoq. Aalajangersakkami siunnersuutigineqarpoq ullormit saaffiginniffimmit pisortanit ikiorsiissutisisoqarsinnaasoq.

Siunnersuutip § 5-iani malittarisassat aamma innersuussutigineqarput, tassani aalajangersarneqarsimammat sumut saaffiginnittoqassanersoq.

§ 16-imut

Imm. 1-imut tunngasoq

Pisortanit ikiorsiissutit aallaaviatigut aningaasanngorlugit tunniunneqartarnissaannut tunngavigisaq siusinnerusukkut peqqussummit ingerlateqqiinnarneqartussatut siunnersuutigineqarpoq. Annertusineqarlunili aningaasartuutitut aalajangersimasunut ikiorsiisarneq ilanngunneqartussatut siunnersuutigineqarlunissaaq, taamaalilluni aningaasat tamarmik aningaasanngorlugit tunniunneqartalerlutik pineqartullu nammineq aningaasartuutit aalajangersimasut akilernissaat isumagisussanngorlugit.

Pisortanit ikiorsiissutit aningaasanngorlugit tunniunneqarsinnaasut, aningaaserivimmuut assigisaanullu ikineqarsinnaapput. Periarfissat suunerinik erseqqissaanissaaq naammangilaq, pisortanit ikiorsiissutit pisartagaqartup kissaateqarneratigut aningaasaatinik aqutisorisamut aqutassanngorlugit tunniunneqarsinnaammata, assersuutigalugu eqqartuussuserisumut imaluunniit naatsorsuutininik kukkunersuiisartumut.

Imm. 2-mut tunngasoq

Pisuni immikkut ittuni aningaasartuutit aalajangersimasut akiliiffissamut toqqaannartumut kommunalbestyrelsip akilersinnaavai aamma/imaluunniit inuussutissatut/allatsitanngorlugit. Qaqutigootumik pisoqarsinnaavoq ikiorserneqartup aningaasat tunniunneqartut aqunnissaat sapersaatigalugit aningaasartuutillu aalajangersimasut akilernissaat "puiorlugit" pisimappat. Kommunalbestyrelsip qinersinnaavaa akiligassat aalajangersimasut akiliiffissamut toqqaannartumik akilersinnaallugit aammalu ikiorsiissutip sinnera aningaasanngorlugu imaluunniit aningaasanngornagu tunniussinnaallugu.

Kommunalbestyrelsip ikiorsiissutip siullermik aningaasanngorlugit tunniuttarnissai misilissavaa, tassunga atatillugu ikiorserneqartoq aningaasaqarnikkut aqutsinissamut siunnersorlugu, tamanna pisariaqartinneqartutut nalilerneqarpat. Pisuni kommunalbestyrelsip naliliineratigut siunnersuineq iluaqutaasinnaanngikkaangat, ikiorsiissutit ingerlaannartumik aqulersinnaavai.

Kommunalbestyrelsip ikiorsiissut aningaasanngorlugu tunniunneqassanersoq naliliinermi immikkut eqqumaffiginiassavaa ilaqutariit meerartaqarnersut, ikiorsiissutip aningaasanngorlugu tunniunneqarnerani ajornartorsiulersussanik. Meeqqanut iluaqutaasusaaq tamatigut pi-ngaarneruvoq aammalu kommunalbestyrelsip eqqumaffigiuannartariaqarpaa meeqqat nerisasaqartuaannarnissaat aammalu allattukkanik meeqqat assersuutigalugu ukiuunerani atisassaannik pisissutissanik tunniussisoqartariaqarnersoq.

§ 17-imut

Imm. 1-imut tunngasoq

Nalornissutigineqarsimavoq pisortanit ikiorsiissutit tunniunneqarneri kingumoortumik siumoortumillu pisassanersut. Siunnersuutigineqarpoq pilersuinissamut akiligassanullu aalajangersimasunut pisortanit ikiorsiissutit ullut 14-ikkaarlugit siumoortumik tunniunneqartassasut. Akiligassanut aalajangersimasunut soorlu ineqarnermut akiliummut innaallagissamullu pisortanit ikiorsiissutit tunniussisarnissami kommuninut ajornannginnerusussaaq anguniarlugu ikiorsiissut aamma piffissamut ullut 14-init sivilisunerusumut tunniussisoqarsinnaavoq. Taamaattoqassappat akiligassanut ikiorsiissut tunniunneqassaaq akiligassap akilerneqarfissaata nalaani.

Kommunalbestyrelisip qularnaassavaa pisortanit ikiorsiissutit akiligassanut aalajangersimasunut atorneqarnissaat. Kommunalbestyrelsi taamaaliorsinnaavoq assersuutigalugu PBS-ikkut akiliisimanerit allagartaat imaluunniit akiligassat akilerneqarsimanerinek uppersaataasa takunerisigut.

Imm. 2-mut tunngasoq

Kommunalbestyrelsip aningaasanngorlugit tunniussinermi tamatigut qularnaassavaa ilaqutariit meeraqarsimappata meeqqat pissaaleqilersimassanngitsut imaluunniit paarinerlugaassanngitsut. Tamatigut meeqqamut iluaqutaasusaaq pingaarneruvoq. Qinnuteqartup ullualun-nguit ingerlaneranni pisortanit ikiorsiissut

tamaat assersuutigalugu imigassamut atussagaa ilimanaateqarpat, taamaalilluni nerisassanut, atisanut allanullu pingaaruteqartunut akissaarutissalluni, taava pisortanit ikiorsiissutit aningaasannagornagit tunniunneqassapput.

Siunnersuummi aamma periarfissiissutigineqarpoq ikiorsiissut piffissamut sivikinnerusumut tunniunneqartarsinnaasoq, tamatumani qinnuteqartoq nammineq ikiorsiissummik aqutsisinnaanani takutitsisimappat, taamaalilluni piffissamut tamarmut aningaasartuutitut matussutissaaruttarluni.

Imm. 3-mut tunngasoq

Siunnersuutigineqarportaaq pisortanit ikiorsiissutinik uppersaatinillu tunniussisarneq pillugit Naalakkersuisut erseqqinnerusunik malittarisassiorsinnaasut. Tassani immikkut eqqarsaatigineqarput kimut tunniussisinaanermik, akiligassat aalajangersimasut uppersaateqarnissaannik kiisalu pilersuinnermut akiligassanullu aalajangersimasunut pisortanit ikiorsiissutisartup aningaasannagorlugit tunniussanik aqutsisinnaannginneranut pissutsit sordiaat atuunnersut.

§ 18-imut

Imm. 1-imut tunngasoq

Ulluinnarni inuuniarnermut aningaasartuutinullu aalajangersimasunut atugassanik pisortaniit ikiorsiisoqarsinnaanngilaq, qinnuteqartoq imaluunniit qinnuteqartup katinnikuullugu apparisaa imaluunniit assingusumik inooqataa pisuussutinik pigisaqarpat, aningaasatigut pisariaqartitanut atorneqarsinnaasunik. Pisuussutit pigisat lotto-mi eqqugaasinnaapput, aningaasat, matumani ilanngullugit akileraarutitigut utertoortit, aammalu nalillit pigisat pisariitsumik aningaasannagortinneqarsinnaasut, assersuutigalugu aktiat, oblikationit, pappiarat nalillit allat kiisalu kuultit, sulvit assigisaallu.

Illu nammineq pigisami imaluunniit piginneqatigiilluni inissiami pisuussutit nalinginnaasumik kommunalbestyrelsimit ilaatinneqassanngillat, pisortanit ikiorserneqartoq taassumalu ilaqutai taamaattumi najugaqarpata. Isiginiartariaqarporli inigisamut akiliutit qanoq naapertuutsigineri, takuuk § 12-imi imm. 2.

Imm. 2-imut tunngasoq

Aammattaaq ilaatinneqassanngillat pisuussutit qinnuteqartup ineqarnikkut atukkat attatiinnarnissaannut imaluunniit ineqarniarnermi pisariaqavissut anguniarnerinut pisariaqartitai. Tamatumani qinnuteqartup ilaqutaasa annertussusaat, ilaqutariit siusinnerusukkut qanoq najugaqarsimaneri, ilinniarneq ingerlatiinnarniarlugu imaluunniit angerlarsimaffimmiit suliffeqarfiup aqunnissaa pissutigalugu piffimmi aalajangersimasumi imaluunniit inini aalajangersimasuni najugaqarnissaq pisariaqarsimansoq isiginiarneqassapput. Piffissaq ungasinnerusoq isigalugu periarfissat kommunalbestyrelsip naliliiffigissavai, taamaalilluni qinnuteqartoq assersuutigalugu napparsimaneq pissutigalugu kingusinnerusukkut inuussutissarsiornissaminut periarfissanik atorluaasinnaanngornissaa

eqqarsaatigalugu, inuussutissarsiornissamut periarfissat pissutigalugit ineqarnermut akisoorujussuarmik akiliuteqaannannginniassammat.

Sulisinnaajunnaarneq pissutigalugu taartisiat aammalu ataavartumik ajoqusersimanermi il.il. taartisiat pisuussutitut ilaatinneqassanngillat, taakkumi aningaasat assersuutigalugu ataavartumik tutsarluttunngornermut, avatinik amigaateqalernermit assigisaannullu taartisiaammata taamaattumik nalinginnaasumik pilersuinermit akiligassanullu aalajangersimasunut atugassatut naatsorsuutigineqartariaqaratik.

Sulisinnaajunnaarneq pissutigalugu taartisianik pisartagallit sulisinnaajunnaarnersiutitik isumannaallisaaneq pillugu inatsit malillugu toqqarsinnaavaat taartisiamik aningaasanngortinnissaat (Kalaallit Nunaanni sulisinnaajunnaarnerup kingunerisaanik isumannaallisaanermit inatsit nr. 273, 24. april 2001-imeersoq atortitussanngortinneqartoq). Taartisinerup kingunerisussaangilaa pisortanit ikiorsiissutisisinnaanerup annaaneqarnera. Taartisiat iluanaarutissartaasa/erniaasa pisuussutitai pisortanit ikiorsiissutitik pisinnaanermit annertussusiliinermullu sunnuteqartussaangillat. Pissutsit taakku atuutsillugit piumasaqaataavoq taartisiat pisortanillu ikiorsiissutisartup pisuussutaanit isertitaanillu allanit immikkoortinneqarsimanissaat.

Imm. 3-mut tunngasoq

Aalajangersakkami piumasaqaataavoq taartisiat pilersuinermit akiligassanullu aalajangersimasunut pisortanit ikiorsiissutitik pisartagallip pisuussutaanit isertitaanillu allanit immikkoortinneqarsimanissaat. Taamatut piumasaqaateqarnerup pilersissavaa pisuussutit ilai sorliit pilersuinermit akiligassanullu aalajangersimasunut pisortanit ikiorsiissutitik naatsorsuinermit ilanngunneqartussaasersut.

§ 19-imut

Imm. 1-imut tunngasoq

Aalajangersakkami ataasiartumik aningaasartuutitut pisortanit ikiorsiissuteqartarneq pillugu piumasaqaatinik aalajangersaasoqarpoq. Ataasiartumik aningaasartuutitut naammaginartumik nassuiaasersorneqarsimasunut ikiorsiisoqarsinnaavoq, aningaasartuummut ileqqaarnissamut qinnuteqartoq aningaasaqarnermigut periarfissaqarsimappat. Taamaattorli nalinginnaasumik ataasiartumik aningaasartuutitut taamaallaat ikiorsiisoqarsinnaavoq, qinnuteqartup aningaasartuut pilersinneqartoq ingerlaavartumik aalajangiisarnermigut eqqarsaatigisimanngippagu.

"Ataasiartumik aningaasartuutit naammaginartumik nassuiaaserneqarsimasut" qanoq paasineqarnissaanni ataasiakkaatigut naliliineq tassani apeqqaataavoq. Amerlanertigut tassani pineqarput nalinginnaasumik atuinermit iluaqutissanut aningaasartuutitut matussutissatut tapiissutit, qinnuteqartup taassumalu ilaqaataasa ulluinnarni inuuneranni atorfissaqartitaat.

Ataasiartumik aningaasartuutitut pisortanit ikiorserneqarnissamut piumasagaavoq § 4-mi, imm. 1-imi pilersuinissamut akiligassanullu aalajangersimasunut pisortanit ikiorserneqarnissamut piumasagaatit naammassineqarsimanissaat, takuuk § 7.

Ataasiartumik aningaasartuutitut ikiorsiinissamut tunngaviusumik piumasagaavoq qinnuteqartumut aappaasoq, takuuk peqqussummi § 2-mi tunngaviusut imaluunniit inooqataasoq, takuuk § 12-imi imm. 6, aningaasartuummik matussusiinnaasunik aningaasaateqassanngitsut. § 18-imi imm.2-mi aallaavittut tunngavigineqartoq tassalu pisuussutit ilaasa aalajangersimasut ilanngunneqartanninnissaannik aalajangersagaq ataasiaannartumik aningaasartuutitinnik tunniussinermi atuuttussaannngilaq.

Imm. 2-mut tunngasoq

Aatsaat immikkorluinnaq ittoqartillugu aningaasartuutitut qinnuteqarnerup nalaani takorloorneqarsinnaasimasunut ikiorsiisoqarsinnaavoq, tamatumani aningaasartuuteqarnissaq pineqartup ilaqutaasalu inuunerannut pingaaruteqarlunnartuusimappat. Aningaasartuutissanut ileqqaagaqarnissamik tunngaviusoq aallaaviatigut atuuppoq.

Kommunalbestyrelsip akiitsunut ikiorsiisinaaneranut naleqquttut assersuutigineqarsinnaasoq tassaasinnaavoq ineqarnermut akiligassat kinguaattoorit, ilaqutariit meerartaqartut anisitaanissaat ulorianartorsiorpat allamillu inissaqartinneqarnatik.

Imm. 3-mut tunngasoq

Siunnersuut malillugu ilaquttat qanigisat perulullutik napparsimaneranni aamma/imaluunniit toquneranni ilisaanerannilu angalanermut aningaasartuutitut kommunalbestyrelsi pisortanit ikiorsiisinnaavoq. Ilaquttat qanigisat tassaapput nammineq angajoqqaat, katissimallugu aapparisaq imaluunniit inooqatigisaq, meeqqat qatanngutillu, taakkuunatilli aapparisaq nalgisatullu inooqatigisaq ilaqutai. Aalajangersagaq Namminersornerullutik Oqartussat kiisalu Tjenestemandit Atorfillillu Kattuffiata akornanni isumaqatigiisummi allassimasup assigaa.

Akikinnerpaamik angalanissamut pisortanit ikiorsiissutinik tunniussisoqartarpoq. Angalanermut aningaasartuutit akilerneqarnissaannik qinnuteqarnermi nakorsamit uppernarsaat ilan-ngunneqartassaaq, tassani takuneqarsinnaassalluni napparsimasup perulunnera pissutigalugu ilaqutaasut aggersartariaqalersimasut. Aallartinnani nakorsamit uppernarsaat pissarsiarineqarsimanngippat kommunalbestyrelsimit piumasarineqarsinnaavoq taassuma kommuunimut najugarisamut uternermi piaartumik takutinneqarnissaa.

Kommunalbestyrelsip suliassanik ataasiakkaanik naliliisarnermini aalajangigassaraa nakorsamit uppernarsaammik piniarnissaq pisariaqarnersoq. Kommunalbestyrelsip kissaatigippagu qinnuteqartup nakorsamit uppernarsaammik pinissani, taassuma piniarneranut aningaasartuutit kommunalbestyrelsip nammineq akiligassarai.

Imm. 1-imut tunngasoq

Aalajangersakkap peqqussummi atuuttumi § 17 assigaa.

Kommunalbestyrelsi assersuutigalugu pequtit assartornerini aningaasartuutitut angalanermilu aningaasartuutitut qinnuteqartumut taassumalu ilaqutaanut ikiorsiisinnaavoq.

Piumasaqaataavoq § 4-mi imm.1-imi piumasaqaataasunik naammassinissimanissaq, piumasaqaataannngilarli nuunnissamut ikiorsiinissami § 6-imi aamma § 7-imi piumasaqaatit naammassineqarsimanissaat.

Piumasarineqarpoq iliuusissap qinnuteqartup ataatsimut inissisimaneranut naleqqiullugu naammaginaruunissaa, ilanngullugu pineqartup siunissami ineqarnermut akiliutip nammineq akilernissaanut periarfissai. Inissiamut akikinnerusumut nuunneq imminermi inissiaqarnikkut pitsanngoriaatitut taaneqarsinnaanngilaq, ataatsimullu naliliinermut pingaarutilittut ilaatinneqarsinnaalluni. Inuussutissarsiutitigut pissutsit pitsanngornissaannut tunngaviuvoq qinnuteqartup suliffissamik qulakkeerunneqarsimanissaa, sulinerullu utaqqiisaaginnartumik suliffiunnginnissaa.

Imm. 2-mut tunngasoq

Kommuunimi qimalikkami kommunalbestyrelsi kommunimi nuuffissami kommunalbestyrelsimut ikiorsiinissaq pitinnagu akuersissummik pissarsiniassaaq, takukkit kommuunit akunnermini akiliiffigeqatigiittarnissamut pisussaaffii pillugit inatsisartut peqqussutaanni aalajangersakkat.

Kommuuni akiliisussaq tassaavoq kommuuni pisortanit ikiorsiissutit pillugit inatsisartut peqqussutaanni tunngaveqartumik ikiorsiissuteqarnermi aningaasartuutit tamani akiliinissamik pisussaaffilik.

§ 21-imut

Aalajangersakkap ilaatigut peqqussummi atuuttumi § 18 assigaa.

Aalajangersakkami inuup Kalaallit Nunaanni najugaqavissuunngitsup angerlamut angalanissaanut ikiorsiinissamik periarfissiisoqarpoq. Piumasaqaataavoq matumani pissaaleqineq pi-neqassasoq, pineqartorlu angerlarnissaminut allatigut periarfissaqanngitsoq. Angerlamut a-ngalanissamut taamaallaat tapiisoqarsinnaavoq.

Piumasaqaataavoq § 3-mi piumasaqaataasut naammassineqarsimanissaat, piumasaqaataannngilarli § 6-imi § 7-imilu angerlamut angalanissaq pillugu pisortanit ikiorsiissutisinnissamut piumasaqaataasut naammassisimanissai.

§ 22-imut

Imm. 1-imut tunngasoq

Aalajangersagaq peqqussummi atuuttumi § 19-imik nangitsinerullunilu erseqqissaataavoq. Ilisinermut aningaasartuutit naleqquttut matussutissaannik pisortat ikiorsiissaannut siunnersuut periarfissiivoq. Aningaasartuutit naleqquttut tassaassapput akikitsumik ilisinermut ani-ngaasartuutit. Illerfimmur, ilerrup inissaanut, naasunut assigisaanullu aningaasartuutinut, ilisinermut namminermt toqqaannartumik atassuteqartunut tapiisoqarsinnaavoq.

§ 23-imut

Aalajangersakkap amerlanertigut peqqussummi atuuttumi § 7 assigaa.

Suliamut paasissutissanik ikiorserneqartup pimoorussilluni peqataasusnaanera pisortat ikiorsiisussaataaananit illuatungilerneqarpoq. Paasissutissat suliamut attuumassuteqartut assersuutigalugu tassaapput akissarsiat allagartaat aningaaserimmilu uninngasuutit allagartaat.

§ 24-imut

Aalajangersakkap peqqussummi atuuttumi § 8 assigaa.

Imm. 1-imut tunngasoq

Paasissutissat suliamut attuumassuteqarsinnaasut assersuutigalugu taakkuusinnaapput suliffittaarnek, kingornussineq, inigisamut akikinnerusumut nuunneq paasissutissalluunniit allat, pisortanit ikiorsiissutip annertussusilerneqarneranut pingaaruteqarsinnaasut.

Pisortanit ikiorsiissutinik pisartagallip ikiorsiissutinik pisartagaqarsinnaanerminut atatillugu pisussaaffigaa aningaasaqarnini, inuttut isumaginnikkullu atukkani pingaarutillit pillugit kommunalbestyrelsimut paasissutissiisussaataanani. Paasissutissiisussaataanermi taamaallaat pineqarput kommunalbestyrelsip ilisimariigaasa avataatigut pissutsit allannguuteqarne-rannit paasissutissat nutaat.

Imm. 2-mut tunngasoq

Paasissutissat suliamut attuumassuteqartut piniarlugit kommunalbestyrelsip pisortat allat aammattaaq attavigisinnavaai, taamaalilluni naliliiffiginialugu suliffissaaleqisoq pisortanit ikiorsiissutinik pisartagaqaannassanersoq. Taamatut paasissutissanik pissarsiniarsinnaanermut periarfissaqarnermut tunngaviniarneqarpoq pisortanit ikiorsiissutinik pisinnaatitaanani pisartagaqarnissap pinngitsoortinniarnissaa. Pisortanilli allanit paasissutissanik pissarsiniarneq kommunalbestyrelsimut ajornarsissaaq inatsisiliornerup allap tamanna ajornartippagu. Taamaattumik paasissutissanik pissarsiniarnermi pissutsit nipangersimasussaataaananermut tunngasut nalunaarsuinermilu malittarisassanut tunngasut isiginiarneqartussaapput.

§ 25-imut

Siunnersuutigineqarpoq pisortanit ikiorsiissutit piffissap qanoq ilinerani kommunalbestyrelsimit utertillugit akiligassanngortinnissaannut erseqqissaasoqassasoq. Siunnersuut isumaqarpoq kommunalbestyrelsi pisuni taaneqartuni pisortat ikiorsiissutaannik utertitsilluni akileeqqusinissamik pisussaatitaaffeqartoq. Kommunallbestyrelsip pisortanit ikiorsiissut utertitassanngortissavaa, qinnuteqartup tamatumunnga pisinnaatitaanani ilisimaarererlugu pisortanit ikiorsiissutisisimappat.

Imm. 1-imut tunngasoq

Ikiorsiissutit utertillugit akilerneqarnissaannik kommunalbestyrelsi piunasaqarsinnaavoq pisortanit ikiorsiissutisisartup paasissutissiisussaatitaanerminik piunasaqaatit naammassisimangippagit, takuuk § 24, imaluunniit ikiorsiissutinik pisinnaatitaannginnini ilisimareeraluarlugu pisortanit ikiorsiissutinik pisartagaqarsimappat. Pisussaaffigalugu ikiorsiissutinik utertitsisussaatitaanermi pisortanit ikiorsiissutit suulluunniit pineqarput.

Inuk pisortanit ikiorsiissutisisartuq aningaasaqarnini, inuttut isumaginninnikkullu pissutsit atukkani pisortanit ikiorsiissutinik pisinnaanerminut pingaarutillit pillugit kommunalbestyrelsimut paasissutissiisussaatitaavoq. Paasissutissiisussaatitaanermi taamaallaat pineqarput kommunalbestyrelsip ilisimariigaanit allannguutit nutaat pineqartillugit. Tassunga tunngatillugu oqaatigineqassaaq paasissutissiisussaatitanermit ilaammata taartisiani assigisaanillu pissarsineq, tamakkulu § 24 malillugu pisortanit ikiorsiissutisisartup kommunalbestyrelsimut paasissutissiisutigisussaavai.

Imm. 2-mut tunngasoq

Salluliorneq isumaqarpoq pineqartup pisortanit ikiorsiissutinik pisartagaqarsinnaatitaanini ilisimareeraluarlugu pisartagaqarsimanera.

Imm. 3-mut tunngasoq

Pisortanit ikiorsiissutitut tunniunneqarsimasunik utertitsinissamik aamma piunasaqartoqarsinnaavoq, pineqartoq kingornatigut tapiissutinik piffissami siunertamullu tassunga tunngasunik pissarsisimappat. Assersuutigalugu inuk siusinaartumik pensionisiassanik qinnuteqarsimasooq qinnuteqaatillu akuerineqarnissaata tungaanut pisortanit ikiorsiissutisisarsimasooq, pensionisiaqalernermini piffissami tassani pisortanit ikiorsiissutisiaminik ilanngaanneqartussaavoq. Siusinaartumik pensionisiat tunniunneqartartussaapput qinnuteqarnerup aallartiffianiit, kingumoortumik piginnaanngorsaaqqiinerullu naammassinerani.

§ 26-imut

Imm. 1-imut tunngasoq

Aammattaaq siunnersuutigineqarpoq pisortanit ikiorsiissutit piffissap qanoq ilinerani

utertitassanngortinneqarsinnaanerannik erseqqissaasoqassasoq. Ikiorsiissutit utertillugit akilerneqarnissaat pillugit kommunalbestyrelsip aalajangiiffigisinnaasai tamarmik aalajangersakkami taagorneqassapput.

Imm. 1-imut tunngasoq

Pisortanit ikiorsiissutisisartuq aningaasaqarnerminik illersorsinnaanngitsumik iliortutut naliliiffigineqassaaq, assersuutigalugu isertitaminik anertuunik piffissap sivikitsuinnaap iluani atuisimappat akissarsianilu piffissap sivilunerusumik iluani pissusissaattut atorsimangippagit, assersuutigalugu aalisartup sapaatip akunnerini tallimani angalariarluni sapaatip akunnerini tallimani sulinngiffeqartup akissarsiaqarluni sulinngiffeqarnermini akissarsiaminik naammattusaarisimangitsup imaluunniit inuup kommuunimut allamut sulinngiffeqarluni aallarsimasup uternissaminulli billettissaminut akissaqarani.

Pisortanit ikiorsiissutisisartuq suliffimmini illersorsinnaanngitsumik iliorsimassaaq sulinngitsooqattaarnini imaluunniit aalakooreluni suliaartorsimanini pissutigalugit soraarsitaasimaguni.

Imm. 2-mut tunngasoq

Aammattaaq pisortanit ikiorsiissutinik utertitassanik pisoqarsinnaavoq, ikiorsiissutinik pisussap piffissap sivikitsup ingerlanerani ikiorsiissutit nammineerluni utertissinnaappagit. Piffissaq sivikitsoq tassaavoq qaammamit ataatsimit sivikinnerusoq. Isumaangilaq pisortanit ikiorsiissutit utertitassanngorlugit tunniunneqartarnissaat.

Kommunalbestyrelsip ikiorsiissutit utertinneqarnissaannik naliliinermini isiginiartussaavaa pisortanit ikiorsiissutisisartup taassumalu ilaqaataa siunissami aningaasaqarnerminnik ataqatigiissitsisinnaanngornissaannut periarfissat qanoq inneri. Kommunalbestyrelsip ilanngullugu isiginiartussaavaa pineqartoq siusinnerusukkut illersorsinnaanngitsumik iliuuseqarsimanersoq aammalu illersorsinnaanngitsumik iliuuseqarnermut utoqqatsissutissaqarnersoq. Assersuutigalugu pisortanit ikiorsiissutisisartuq ilaqtariinni napparsimasoqarnera pissutigalugu sulinngitsoorsimanersoq.

Imm. 2-mut tunngasoq

Aalajangersakkami imm. 2-mi nr. 1-i pingaaruteqalissaaq pineqartoq piffissap sivikitsup iluani ikiorsiissutinik utertitsisinnaappat.

Pissutsit kommunalbestyrelsimit ilisimaneqartussaapput pisortanit ikiorsiissutinik tunniussinermi ikiuinissaq pisariaqalersimappat pineqartup aningaasanik illersorsinnaanngitsumik atuisimanagera pissutigalugu.

Utertitsinissamik kinguartitsineq kommunalbestyrelsimit akuerineqarsinnaavoq pisartagalik taassumalu ilaqtai taamaallaat pisortanit ikiorsiissutinik isumalluuteqarpata. Pilersuinermit akiligassanullu aalajangersimasunut pisortanit ikiorsiissuteqartarnermi ilanngunneqarsimangillat pisassarinnngisanik tapiissutisiaqarsimaneq taamaattumillu missingersorneqartariaqarpoq ilaqtariit

tapiissutunik amerlanerusunik pisimasut akiliisinnaannginnerat. Utertitsinissamik kinguartitsineq akuerineqarsinnaavoq imm. 1, nr. 1 aamma imm. 1. nr. 2 malillugit.

Imm. 3-mut tunngasoq

Siunnersuummi ingerlateqqinneqarpoq kommunalbestyrelsi immikkut ittoqartillugu ikiorsiinissamik aalajangiinnermit ukiup ataatsip ingerlareernerani aalajangiinnaasoq, utertitassan-ngortitsineq atorunnaassasoq. Assersuutigalugu imaattoqarsinnaavoq qinnuteqartoq suli pisortanit ikiorsiissutisisartooq aammalu nalilerneqartoq pineqartoq piffissami qanittumi suliffeqalernavianngitsoq imaluunniit kommunalbestyrelsip naliliinera malillugu utertitassanngortitsisimaneq pineqartup suliffeqarnermut attaveqalernissaanut akornutaasoq, soorlu inuussutissarsiummini sakkussaminut, soorlu qassutitut orsussamullu akissaqarani.

§ 27-imut

Imm. 1-imut tunngasoq

Aalajangersakkap peqqussummi atuuttumi angerlarsimaffimmi ikiorteqartitsineq pillugu § 22 assigaa. Angerlarsimaffimmi ikiorteqartitsineq pillugu malittarisassat angerlarsimaffimmi ikiorteqartitsineq pillugu nalunaarummi nr. 32-mi, 26. juli 1994-imeersumi aalajangersarneqarsimapput, allannguuteqartinnagit ingerlateqqinneqartut.

Imm. 2-mut tunngasoq

Angerlarsimaffimmi ikiorteqartitsinissap akuersissutigineqarnissaanut tunngaviussapput pissutsit isumaginninnermut peqqissutsimullu tunngasut. Aamma periarfissaassaaq inuit ilaqutariillu namminneq angerlarsimaffimmi ikiorteqarnissamut qinnuteqarnissamut pisariaqartitsisutut naatsorsuutigisut. Immikkoortinneqassapput piffissami sivilisunerusumi angerlarsimaffimmi ikiorteqartitsineq aamma ilaannikkuinnaq angerlarsimaffimmi ikiorteqarnissamik pisariaqartitsisut.

Imm. 3-mut tunngasoq

Kikkut ikiorteqarsinnaanerit, angerlarsimaffimmi ikiorteqarnermut akiliutit, angerlarsimaffimmi ikiortit suliassaarfii suliassaallu, allaffissorneq naammagittaalliuuteqarsinnaanerlu pillugit malittarisassiorqarsinnaavoq.

Malittarisassatigut aalajangersarneqarsinnaavoq angerlarsimaffimmi ikiorteqarnissamut qanoq akiliuteqarnissaq. Angerlarsimaffimmi ikiortip illumi suliassat nalinginnaasut suliassarai, soorlu eqqiaaneq, nerisassiorneq, atisanik errorsineq inuullu timimigut eqqiluisaarnissaanut tunngasut.

Angerlarsimaffimmi ikiorteqartitsinerup allaffissornertaa kommunalbestyrelsip suliassaraa.

Inunnik isumaginninnerup aquneqarnera aqqissuussaanelu pillugit Inatsisartut peqqussutaanni nr. 11-mi, 12. november 2001-imeersumi malittarisassat malillugit

aalajangiinerit angerlarsimaffimmi ikiorteqartitsinermut tunngasut naammagittaalliutigineqarsinnaapput.

§ 28-imut

Peqqussutip atuuttup § 24-iat aalajangersakkap assigaa. Aalangiinerit tamarmik Isumaginninnermi Maalaaruteqartarfimmut naammagittaalliutigineqarsinnaapput aalajangiinerup iner-nerata paasineraniit sapaatip akunneri sisamat qaangiutsinnagit. Naammagittaalliutip qanoq ilusilersugaanissaa pillugu piumasaqaateqartoqanngilaq.

§ 29-imut

Aalajangersakkap peqqussummi atuuttumi § 23 assigaa.

Inatsisartut peqqussutaannut naleqqiullugu aningaasartuutit tamarmik kommuninit akiler-neqassapput, takuuk kommuunit akunnerminni akiliisussaataanerat pillugu inatsisartut peqqussutaat.

§ 30-imut

Siunnersuutigineqarpoq inatsisartut peqqussutaat ulloq 1. januar 2007-imi atuutilissasoq.